

# Qirsixlluxl Sul

## Qirsixlluxl Sul Azo Biar

Sul eil ber gga zoxlzoxl a sirler ddei leil biar, yel sul eil ber gga sirler ddei mel hazzi zoxlyoxl.

- Arbosobo ca mel leil sir boxl seir lol (1:3; 14:13; 16:15; 19:9; 20:6; 22:7; 22:14)
- Ddar sir qier bbeix a Arbosobo leil bbeix zae gger (5:12; 7:12)
- Jiaxlhuixl sirler leil biar (1:11)
- Arbosobo ddei Xiu sirler leil biar (1:4)
- De sir zar biar (1:12)
- Gie sir taex biar (1:16)
- Za sir taex biar (5:1)
- Cuxgexdaex sir baex nei meixddur sir bbor biar (5:6)
- Baerlae sirler leil biar (8:6)
- Zzirmar oldde ddei leil ddexrlabox sirler leil biar (12:3)
- Goxrsol-goxrnaxr sir boxl nei ddorbax sir peixl biar (15:6-7)
- Worga sir ga nei zzirmar sirler leil biar (17:9-10)

## Qirsixlluxl Sul Arsae Bbe Kae

Sul Eil Ber Azo Biar Nei Zzasoso Dae Biex (1:1-8)

Sul Eil Ber Azo Biar (1:1-3)

Jiaxlhuixl Sirler Leil Zzasoso Dae Biex (1:4-8)

Yisu Zidu Yar Leil Ddarzzi Su Mel Leil Quex (1:9-3:22)

Yisu Zidu Yuehal Leil Yar Leil Mia Lol (1:9-20)

Yisu Zidu Jiaxlhuixl Sirler Dax Ddar Biar (2-3)

Yuehal Merlabbor Mia (4-5)

Merlabbor Hher Dae A Arbosobo Leil Bbeix Zae Gger (4:1-11)

Ya Ddei Vei Dae Sul Hal Jur (5:1-14)  
Arbosobo Ca Mel Leil Faxr (6-20)  
Za Sir Taex Giexl Deix Dae (6:1-8:5)  
Baerlae Sirlar (8:6-11:19)  
Murgurgurmo Sir Yoxr Ddux Lei (12-16)  
Ggecir Vurlelsu Ssormaer Ddei Mel Dder Babirluixr Zzi  
Arbosobo Yar Leil Faxr (17:1-19:10)  
Mur Piulpiu Zzaer Su Ddei Mel Yisu A (19:11-16)  
Arbosobo Yar Leil Vuxryixr Su Mel Leil Deil Leixl Gger Yaa Leil  
Serpaxl Jjia (19:17-20:15)  
Cirza-Hanga Yarsixl Loxr A (21:1-22:5)  
Mersixl-misixl (21:1-8)  
Yiluxlsaler Yarsixl (21:9-22:5)  
Yisu Jjixr Lei Du A (22:6-21)

# 1

## Sul Eil Ber Azo Biar Nei Zzasoso Dae Biex

### Sul Eil Ber Azo Biar

<sup>1-2</sup> Sul eil ber mel Yisu Zidu ca mel leil arddolcar a arsae lerler nga var saexl lol ar ber a.<sup>a</sup> Arbosobo nael Yisu Zidu leil arsae lerler nga var saexl lol; Yisu nael yoxl tisir<sup>b</sup> leil miardal a yar ddei miar bei gger su Yuehal

---

<sup>a</sup>1:1-2 Sul eil ber lei ca mel leil Yisu Zidu arsaesael nga bbeix gger.

<sup>b</sup>1:1-2 *tsir* Xilaxl ddar gga tisir ddei yilsi mel dder si leil ddar bbeix gger ssi su. Qirsixlluxl Sul eil ber gga “tsir” bbeix a mel cirdaedae a nael Yisu leil bbeix, cirdaedae a nael ca leil bbeix, cirdaedae a nael merlabbor hher dae hal mel leil lei bbeix.

leil saexl lol a. Yuehal dder yar mia eil mel vaexr zeil lei a, Arbosobo ddei ddar mel yarzi a bbaexl ca leil bbeix gger, halae Yisu Zidu ca leil saexl lol eil mel lei yarzi a bbaexl ca leil bbeix gger a. Eine nga a Yisu Zidu dder yar leil miar bei gger su mel leil arddolcar a arsae lerler nga var eil mel saexl lol a. <sup>3</sup> Sul eil ber leil bbeix dae eil mel mel hormo ardae nr goxr dder eine nga du a. Yel sul eil ber zza su ca mel Arbosobo yaa leil seir lol. Halae sul eil ber leil noni wo a bei mae dae su ca mel lei Arbosobo yaa leil seir lol.

### **Jiaxlhuixl Sirler Leil Zzasoso Dae Biex**

<sup>4-5</sup> Ngo mel Yuehal a. Ngo Yalxilyal mermi<sup>c</sup> jiaxlhuixl sirler leil xil vaexr gger. Arbosobo nei Arbosobo ddei Xiu, halae Yisu Zidu nia leil seirseir meixl gger lol nia, nixmox zzaso lol nia. Arbosobo mel azo lei nr zza seir dder gol dae ddei nga a; eilleix lei gol dae; arddolcar a yar lei nia. Arbosobo ddei baxrde taex xilmeir mel xiu sirler<sup>d</sup> hher dae. Yisu Zidu mel dder Arbosobo bbeix dae mel yarzi a bbaexl ca leil bbeix gger su ddei nga a. Yar leil mel ddarzziddo. Yar ar boxl si goxr a; nael yoxl gol du xixl lei beil zzir ddei nga a. Yar middurbbor zzirmar mel ddei zzirmar bei. Yar niul leil perniar, niul leil weix a sirnilni ddux a si a; yel niul leil zuixl gga jiuxl teixl lei.<sup>e 6</sup> Niul leil Merhhexr ddei goxr gga cassor-worssor bei lol, halae niul leil Arbosobo leil zi su bei lol. Yar leil mel cirse-cirsil lei middux lol nia, quexrlixl zza lol nia. Amae.

---

<sup>c</sup>**1:4-5** *Yalxilyal mermi* Yalxilyal mermi ddei mel Loxrmarm goxrjia gga hher ji dae.

<sup>d</sup>**1:4-5** *xiu sirler* Xiu eil sirler mel dder Arbosobo ddei Xiu.

<sup>e</sup>**1:4-5** *Yar niul leil perniar, niul leil weix a sirnilni ddux a si a; yel niul leil zuixl gga jiuxl teixl lei.* Xiboxrlaexr Sul 9:11-28 leil i ssi.

<sup>7</sup> Nia i dae la ddo a! Yar zico leil ngier dae a ze i lei;  
middurbbor ca maelmaerjjia lei yar leil mia nia,  
halleix zzargger<sup>f</sup> sser a yar leil zzir su mel lei yar lei mia nia,  
mer woxrke ca hazza lei yar jjixr lei ggie mia a daxlgaxl nge nia.  
Eil mel mel arsaebeilei eine nga nia. Amae.

<sup>8</sup> Seirpor Arbosobo bbeix: “Ngo mel A'exrfar a (yilsi mel dder ollele ddei), ngo mel Exrmeixrgexr a (yilsi mel dder maelele ddei). Ngo mel azo lei nr zza seir dder gol dae; eilleix lei gol dae; arddolcar a ngo halae jjixr lei nia. Ngo mel ddo zzir ddei nga a,”<sup>9</sup> eine bbeix a.

## Yisu Zidu Yar Leil Ddarzzi Su Mel Leil Quex

### Yisu Zidu Yuehal Leil Yar Leil Mia Lol

<sup>9</sup> Ngo mel nia ddei arzzi-nimar Yuehal a. Niul Yisu leil ddarzzi a, Arbosobo ddei goxr gga cassor-worssor loxr, cirgo a goxr sol, cirgo a sser gex dae. Ngo Arbosobo ddei ddar nei Yisu Zidu arsae lerler bbeix goxr a ca leil biar gger a, yel ca mel dder ngo leil Baxrmoxr dal hal taex leil ge du lei a. <sup>10</sup> Seirpor ddei nixixl<sup>h</sup> ar ni a, Arbosobo ddei Xiu ddei ngo leil hier dae a ngo baerlae mex dae qiurte sael a ar ddei bbejjiur a.

---

<sup>f</sup>**1:7** *zzargger* Zzargger eil baex mel oldde piar a gga mel teixvilvilmo altor sael a ar baex dexl dae.

<sup>g</sup>**1:8** *Ngo mel A'exrfar a yilsi mel dder ollele ddei, ngo mel Exrmeixrgexr a yilsi mel dder maelele ddei* “A'exrfar” yilsi mel dder zza beil zzir ddei nga a. “Exrmeixrgexr” yilsi mel dder maele zzir ddei nga a. Arbosobo mel cirza-hanga leil bei beil lol, bei jjia lol.

<sup>h</sup>**1:10** *Seirpor ddei nixixl* Seirpor ddei nixixl mel dder xiqiti cir ni leil bbeix.

Qiuerte eil ddei mel yarzi vaer, ngo giedae piar a gga ngo leil <sup>11</sup> bbeix: “Ni mia eil mel vaexr zeil la; yel sul eil ber Yirfuxrsor zzi gga, Sixlmeirnaxr zzi gga, Bixrjiamoxr zzi gga, Tuiyartuila zzi gga, Sardir zzi gga, Feilatixrfei zzi gga, Lardirjia zzi gga jiaxlhuixl eil sirler leil ho mal gger,”  
eine bbeix a.

<sup>12</sup> Ngo za xixl lei a, arseir ngo dax ddar biar dae bbe i, yel ngo dder sae bei teixl lei de sir zar mia a. <sup>13</sup> De agala gga mel Ca Ddei Ssor<sup>i</sup> sael a ar ddei ngier dae. Yar mel pia cimaeder ddei sisi ar xiux veixr dae, nixmoxzo ddei leil nael sae bei teixl lei yarsael ar zex neixl gex dae.

<sup>14</sup> Yar ddei olce me nael ya me nei wor sael a piu, meixddur ddei nael adoxl bbiu ji dae sael a nga.<sup>j</sup> <sup>15</sup> Qihher ddei nael adoxlbbeix gga cu goxr zzir mel sael a bbo, qiuerte ddei nael ajjix porpolpor pe zeil lei sael a nga.

<sup>16</sup> Yar leixrhher yo bbor gga nael gie sir taex vei dae, meir gga nael altor ser nr piar niar ar baex pir teixl lei, qiaxrmeix ddei nael merni sael a meixgie.

<sup>17</sup> Ngo yar leil mia a qie, gexr zildu a, yar qihher ddei dax puxr gex dae a, ca sima sael a loxr a. Yel yar leixrhher yo bbor ngo leil ta gex dae a bbeix: “Gexr nr ssa, ngo mel ollele ddei a; maelele ddei a. <sup>18</sup> Ngo gol doxr dae, ngo halleix ar boxl si goxr a; nael yoxl gol du xixl lei a. Ngo cirse-cirsil lei gol dae. Halae ca si ho a hher ggie zzuxci ddei ngo guaxr dae, ca leil si lol bbeixsael gol lol lei ngo lozza. <sup>19</sup> Yel ni mia ho mel nei eilcar arsae lerler nga dae mel vaexr zeil lei nia. Halae arddolcar a sael nga var eilzzu maelmaerjjia vaexr zeil lei nia. <sup>20</sup> Ni mia dae sae bei teixl lei de sir zar nei ngo leixrhher yo bbor gga gie sir taex eil mel ddei yilsi mel dder eine a: de sir zar nael jiaxlhuixl sirler leil bbeix, gie mel nael tisir leil bbeix. Gie sir taex mel hherdder jiaxlhuixl sirler leil guaxr su

---

<sup>i</sup>**1:13** *Ca Ddei Ssor* “Ca Ddei Ssor” mel dder Yisu leil bbeix.

<sup>j</sup>**1:14** Daxlyirlir Sul 7:9 nei 10:6 leil i ssi.

tisir hal sirlar leil bbeix. Eil mel mel dder halleix nia leil nr saexl lol mel nga a.”

## 2

### Yisu Zidu Jiaxlhuixl Sirlar Dax Ddar Biar

#### *Yirfuxrsor Jiaxlhuixl Leil Xil Vaexr Gger*

<sup>1</sup> Yisu Zidu ngo leil bbeix: “Ni Yirfuxrsor jiaxlhuixl ddei tisir leil xil vaexr gger nia, yel yaa leil bbeix gger a bbeix:map of the 7 churches of Asia|Seven Churches YCL.tif|span|Rev 2-3|SIL|

‘Ngo<sup>k</sup> mel leixrhher yo bbor gga gie sir taex vei dae nei sae bei teixl lei de sir zar gga ssi dae hal ddei nga a. <sup>2</sup> Nia Yirfuxrsor jiaxlhuixl gga ngo leil ddarzzi su mel arsae lerler bei dae, arsae sulku, arsae ssersei xie eil mel maelmaerjia lei ngo saexl. Nia ca yarzi gexrddo bei su hal mel leil vuxryixr ngo saexl. Ca cirmelmel a yaa ddei yaa ngo miardal dae ca bbaexl bbeix, yel nia mel ca hal mel leil sixr i goxr a dder yaa mel yarjia a nga saexl a. <sup>3</sup> Nia yarzi ssertexr zza, ngo mi ddei leil weix a, hormo goxr sol a lei, ngo dax bei mae dae. <sup>4</sup> Nael ngo nia leil botaddu ar ddei zza. Nia ngo leil halleix sael a per-nr-niar a. <sup>5</sup> Yel nia arsaenga a ho bei ho ngo leil halleix sael a per-nr-niar arleixr holcir nia. Nia huixrsoxr nia, ngo leil halleix sael a perniar xixl nia. Nia huixr-nr-soxr arddeirnga a, ngo dder lei a nia ddei de zar leil dol ggie nr zza lol vei pixl gger du a. <sup>6</sup> Nael nia halae seirseir ar yoxr zza. Nia lei ngo sael a Nixrgela mi hal cir bei dae mel leil vuxryixr.

<sup>7</sup> Arbosobo ddei Xiu ddei jiaxlhuixl mel leil bbeix dae ddar mel, nolba niar dae ca hazza dder noni dae nia. Ha bei leixl su ca mel

---

<sup>k</sup>2:1 Ngo “Ngo” mel dder Yisu leil bbeix.

ngo yaa leil olga zza saer zzei hal zzei ddei saer mel zzor lol nia, yel yaa cirse-cirsil gol dae var.<sup>l</sup> Saer zzei eil zzei mel merhhexr gga Arbosobo cirza-hanga yarzzei dae ggie dae ji dae.’ ”

*Sixlmeirnaxr Jiaxluixl Leil Xil Vaexr Gger*

<sup>8</sup> Yisu Zidu yoxl ngo leil bbeix: “Ni Sixlmeirnaxr jiaxluixl ddei tisir ddei leil xil vaexr gger nia, yel yaa leil bbeix gger a bbeix:

‘Ngo mel Ollele ddei a; ngo mel Maelele ddei a; ngo si a yoxl gol du xixl lei hal ddei nga a. <sup>9</sup> Nia Sixlmeirnaxr jiaxluixl gga ngo leil ddarzzi su mel casolssor a nga, hazzi goxr sol goxr dae ngo saexl, nael Arbosobo i dae a nia mel cabessor a. Yaa ddei yaa Yoxrtaexl su a bbaexl bbeix su hal mel nia leil bbeix no a lei ngo saexl, nael yaa mel Yoxrtaexl su nr nga, yaa neir zzirmar Sardaxl dax cir cir a nga. <sup>10</sup> Nia i dae la ddo a. Neir zzirmar te mel nia leil sixr i niazzir a, nia ca cirmelmel leil cageggie ge ji gger, yel nia yarzi goxr sol cei ni goxr nia. Nia yarzi goxr sol hal mel goxr ci car a gexr nr ssa, nia si lo zzezze ci a lei ddarzzi doxr dae nia, ngo nia leil cirse-cirsil olga zza lol.

<sup>11</sup> Arbosobo ddei Xiu ddei jiaxluixl mel leil bbeix dae ddar mel, nolba niar dae ca hazza dder noni dae nia. Ha bei leixl su ca mel dder zeixleixr ar boxl si nr var a;<sup>m</sup> yilsi mel dder Arbosobo yaa leil nr faxr.’ ”

*Bixrjiamoxr Jiaxluixl Leil Xil Vaexr Gger*

<sup>12</sup> Yisu Zidu yoxl ngo leil bbeix: “Ni Bixrjiamoxr jiaxluixl ddei tisir ddei

---

<sup>l</sup>**2:7** *yaa leil olga zza saer zzei hal zzei ddei saer mel zzor lol nia, yel yaa cirse-cirsil gol dae var.* Cuaxlsixljil Sul 2:9 nei 3:22-23 leil biar dae.

<sup>m</sup>**2:11** *Ha bei leixl su ca mel dder zeixleixr lei ar boxl si nr var a.* Qirsixlluxl Sul 20:6, 20:14, nei 21:8 leil biar dae.

leil xil vaexr gger nia, yel yaa leil bbeix gger a bbeix:

‘Ngo mel altor ser nr piar niar ar baex zza hal ddei nga a.<sup>13</sup> Ngo saexl, nia hher ggie halmaex mel hherdder Sardaxl te zzirmar bei ggie nga a. Nael nia halae ngo dax bei mae dae. Nia ca mel gga Atixrpaxl mi ca hal ddei mel ngo leil yarzi ddarzzi, halae zabbar seirseir a ngo arseir a ca leil bbeix gger. Yar leil mel Sardaxl hher ggie seixl zil gger a; nael nia halae nixmox nr bbiex, ngo leil ddarzzi doxr dae.<sup>14</sup> Nael ngo nia leil botaddu armel zza. Nia ca mel gga cirmelmel a Balaxr mul gger dae mel dax bei mae ssi a. Balaxr mel zzirmar Balexl leil mul gger a, Yirsaexllixl su ca mel leil bbex leil zi goxr hal mel zzor lol; capor ssormaer zzi dax kerjia, zuixl eil mel bei lol.<sup>n 15</sup> Halae cirmelmel a Nixrgela mi hal cir dax bei mae ssi.<sup>16</sup> Yel nia nr seir mel zeixleixr bei nr ddo, seirseir bei nia. Huixr-nr-soxr arddeirnga a, ngo cirleixr dder lei du a. Ngo meir gga altor baex sser a, ca eil mel dax zaxlddaexr nia.

<sup>17</sup> Arbosobo ddei Xiu ddei jiaxlhuixl mel leil bbeix dae ddar mel, nolba niar dae ca hazza dder noni dae nia. Ha bei leixl su ca mel dder ngo yar leil kerzi dae *marnaxr*<sup>o</sup> mel gger nia, halae legelbbe piulpiu ar taex gger nia. Legelbbe piulpiu taex leil mi sixl ar ddei vaexr deix dae; mi eil ddei mel li wo su ca ddei lar saexl.’ ”

### *Tuiyartuila Jiaxlhuixl Leil Xil Vaexr Gger*

<sup>18</sup> Yisu Zidu yoxl ngo leil bbeix: “Ni Tuiyartuila jiaxlhuixl ddei tisir ddei

---

<sup>n</sup>2:14 Yaa azo lerler zuixl bei mel Mixrsuxljil Sul 22:5; 22:7, nei 25:1-3 nei Semixljil Sul 23:4 leil biar dae.

<sup>o</sup>2:17 *marnaxr* Yirsaexllixl su ca mel Aezixr goxrjia ddux lei ho a, yaa mipaerbbae gga hher dae car, Arbosobo yaa leil *marnaxr* gger a zzor lol. Cu'aezixr Sul 16:14-16, 16:33-35 leil i ssi.



leil xil vaexr gger nia, yel yaa leil bbeix gger a bbeix:

‘Ngo mel Arbosobo ddei Ssor a. Meixddur ddei adoxlle sael a bbo, qihher ddei ca goxr zzir mel sael a bbo hal ddei nga a.<sup>19</sup> Nia Tuiyartuila jiaxlhuixl gga ngo leil ddarzzi su ca mel arsae bei dae mel ngo saexl. Nia ngo leil perniar, ngo leil ddarzzi, ngo leil visser, halae ssertexr zza ngo saexl. Nia eilleix bei dae mel bir halleix ngo leil ddarzzi a nga seir bei dae mel leil miur leixl lei ngo saexl.

<sup>20</sup> Nael ngo nia leil botaddu ar ddei zza. Nia mel Yisirbixr mi ssormaer hal ddei arsae bei niazzir arsae bei dae lei nia halae ssersei ddo. Yar mel yar ddei yar xiezi ar ddei a eine bbeix. Yar ngo dax bei mae su mel leil nol a, yar dax kerjiar lol, halae yaa leil mul gger a bbex leil zi goxr hal mel zzor lol.<sup>21</sup> Ngo halleix yar leil nr seir mel zeixleixr bei nr ddo, seirseir bei nia bbeix goxr a; nael yar halae huixr-nr-soxr capor dax kerjiar doxr.<sup>22</sup> I dae la ddo a. Ngo yar leil no lol a yixrgguci ddei leil yixr doxr dae lol nia. Yar dax kerjiar su mel lei huixr-nr-soxr arddeirnga a, yaa leil lei yar sael yarzi goxr sol lol nia.<sup>23</sup> Ngo halae yar dax bei mae su mel<sup>p</sup> leil seixl nia. Eine nga a mel jiaxlhuixl cirddeir-hanga lei saexl, ca mel nixmox zzar arsaesael nga maelmaerjjia ngo saexl. Nia ca cirddeir-hanga arsae bei mel ngo dder nia leil arsae bei koxl xixl.

<sup>24</sup> Nael nia Tuiyartuila jiaxlhuixl gga ssormaer hal te dax bei nr mae su ca mel, nia Sardaxl te mul gger dae mel dax bei nr mae ssi, ngo nia leil bbeix gger, ngo nia leil kebal miar mel gger nr dax.

<sup>25</sup> Nael ngo nia leil mul gger goxr mel nia zabbar seirseir a bei zei si nia, ngo lei zzezze bei ci.

<sup>26-28</sup> Ngo miardal dae mel dax bei mae doxr dae a bei leixl su ca

---

<sup>p</sup>**2:23** *yar dax bei mae su mel* Xilaxl ddar mel “yar dax bei mae su” nr bbeix, “yar ddei aniuX” bbeix.

mel, ngo dder yaa leil middurbbor ddei goxrjia leil guaxr quexrlixl gger nia, hherdder Ngabbor ngo leil gger mel dax ciryoxr a nga. Arbosobo Ddei Sul ber leil bbeix:

Yar mel he zzargger caex sser a  
mer woxrke goxrjia maelmaerjjia leil guaxr nia;  
halae nilhar cu teixl lei olbbexr mel leil deil me gger sael a  
yaa leil deil me gger nia.<sup>9</sup>

Bei leixl su hazza mel ngo yaa leil merteir a ddux dae gie hal taex<sup>5</sup> gger nia. <sup>29</sup> Arbosobo ddei Xiu ddei jiaxlhuixl mel leil bbeix dae ddar mel, nolba niar dae ca hazza dder noni dae nia.’ ”

### 3

#### *Sardir Jiaxlhuixl Leil Xil Vaexr Gger*

<sup>1</sup> Yisu Zidu yoxl ngo leil bbeix: “Ni Sardir jiaxlhuixl ddei tisir leil xil vaexr gger nia, yel yaa leil bbeix gger a bbeix:

‘Ngo mel Arbosobo ddei Xiu sirler zza nei gie sir taex zza hal ddei nga a. Nia Sardir jiaxlhuixl gga ca mel arsae bei dae mel ngo saexl. Kebal ca mel nia leil i dae a nia zabbar seilseir a ngo dax bei mae

---

<sup>9</sup>**2:26-28** *Yar mel he zzargger caex sser a mer woxrke goxrjia maelmaerjjia leil guaxr nia; halae nilhar cu teixl lei olbbexr mel leil deil me gger sael a yaa leil deil me gger nia* Ddar eil qier mel Sipi Sul gga 2:9 leil bbeix dae ar qier a. Ca eil ddei mel hherdder Yisu a. Yisu mer woxrke goxrjia mel leil deil me gger a mel, yaa Arbosobo leil dir doxr a nga arddeir a.

<sup>5</sup>**2:26-28** *merteir a ddux dae gie hal taex* Qirsixlluxl 22:16 leil i ssi.

dae, nael nia zzael ngo dax bei nr mae dae, eil mel lei ngo saexl.

<sup>2</sup> Ngo i dae a nia bei dae miar mel Arbosobo meixddurga gga mel bei jjia gax-nr-zi. Yel nia zucur nia, armael ddei armael leil hhel du xixl lei lol nia. Nr nga a mel nia dder ho bei ho ngo leil ddar-nr-zzi var. <sup>3</sup> Yel nia ngo nia leil mul gger dae ddar mel bbejjiur wo a mel dder holcir dae nia, zabbar bei mae dae nia, huixrsoxr nia. Nia zu-nr-cur arddeirnga a, ngo saexl loci a qie zzaexpor sael a lei. Ngo arddolcar lei mel nia arsaebeilei saexl nr var.

<sup>4</sup> Nael nia Sardir jiaxlhuixl gga ca cirmelmel a pia ddei bei nr naex lol, yel yaa pia piulpiu hal xiux veixr piar, ngo dax cirgo a hher wo ddo. <sup>t</sup> <sup>5</sup> Bei leixl su ca hazza lei ciryoxr a pia piulpiu hal xiux veixr nia. Ngo arsaebeilei yar ddei mi ddei Arbosobo mi guax deix dae sul hal ber leil huax pixl gger nr var. Sul hal ber mel dder cirse-cirsil olga zza su ca mel ddei mi guax deix dae ber nga a. <sup>u</sup>

---

<sup>t</sup>**3:4** Yirsaexlyal Sul 64:6 bbeix ca maelmaerjjia bei dae mel lei mae yarzi naex hal mel sael a nga. Yilsi mel dder ca maelmaerjjia zuixl zza. Nael Yisu yar leil ddarzzi su ca mel leil pia piulpiu yarzi naxrcixl gger. Yilsi mel dder Yisu yaa ddei zuixl maelmaerjjia ssoxrsuxl a. Qirsixlluxl Sul 6:11; 7:9; 7:14; 19:8 leil i ssi.

<sup>u</sup>**3:5** *Sul hal ber mel dder cirse-cirsil olga zza su ca mel ddei mi guax deix dae ber nga a.* Arbosobo Ddei Sul ber gga sul li yoxr biar dae: Sul xilmeir hal yoxr mel cirse-cirsil olga zza su ca mel ddei mi guax deix dae sul ber nga a. Qirsixlluxl Sul 3:5; 13:8; 20:12, nei 21:27, halae Feilixlbir Sul 4:3 sul eil yox leil biar dae. Sul nr yoxr ddei nael Arbosobo leil ddarzzi su ca mel yar leil arsae lerler xiar dae mel vaexr dae. Marlazi Sul 3:16 leil biar dae. Sul so yoxr ddei nael ca mel middurbbor nixixl goxr dae car a arsae lerler nga goxr guax deix dae. Qirsixlluxl Sul 20:12 leil biar dae. Sul li yoxr ddei nael Yisu leil ddar-nr-zzi su mel ddei mi

Ngo halae Ngabbor nei Ngabbor ddei tisir mel meixsaer qier leil yar mel ngo ddei ca a ssexl nia. <sup>6</sup> Arbosobo ddei Xiu ddei jiaxlhuixl mel leil bbeix ddar mel, nolba niar dae ca hazza dder noni dae nia.’ ”

*Feilatixrfei Jiaxlhuixl Leil Xil Vaexr Gger*

<sup>7</sup> Yisu Zidu yoxl ngo leil bbeix: “Ni Feilatixrfei jiaxlhuixl ddei tisir ddei leil xil vaexr gger nia, yel yaa leil bbeix gger a bbeix:

‘Ngo mel seirceix-seirmaer ddei a; ngo ddarzi mel a bbeix, ngo mel zzirmar Daxlweixl ddei zzuxci vei dae.’<sup>v</sup> Ngo alddur ddei ggapu a mel dder arseir lei ggabil nr xie, ngo ggabil a mel dder arseir lei ggapu nr xie, hal ddei nga a. <sup>8</sup> Nia Feilatixrfei jiaxlhuixl gga ngo leil ddarzzi su mel arsae bei dae mel ngo saexl. Nia nixmox zzar bei le bbeixarnar, halae ngo miardal dae mel dax bei mae dae, ngo leil ddar-nr-zzi nr bbeix, eil mel lei ngo saexl. Ngo mel nia xilmeir alddur ar peixl ggapu gger ho a, arseir lei ggabil nr xie. <sup>9</sup> I dae la ddo a. Yaa ddei yaa Yoxrtaexl su a bbaexl bbeix su ca hal mel mel Yoxrtaexl su nr nga. Yaa mel Sardaxl dax cirgo a ca leil fur su hal mel a. Ngo yaa leil nia xilmeir cizixl gger lol nia, yel yaa leil ngo nia leil perniar saexl lol nia. <sup>10</sup> Nia mel ngo miardal dae mel dax bei

---

ddei huax pir gger ho a. Yuehal Sul Vaexr Beil Ber 4 nei 5 halae Qirsixlluxl Sul 22:19 leil biar dae.

<sup>v3:7</sup> *Zzirmar Daxlweixl ddei zzuxci vei dae* Arbosobo zzirmar Daxlweixl leil bbeix gger a bbeix yar giedae ca ddei mel cirse-cirsil zzirmar bei nia. Yirsaexlyal Sul 22:22 leil i ssi. Yisu mel dder Daxlweixl giedae ca. Martaexl Sul 1:1 nei Luxljia Sul 2:4 leil i ssi. Yisu zzuxci vei dae yils mel dder yar arseir leil Arbosobo ddei goxr gga ddir lol arseir leil nr ddir lol quexrlixl zza.

mae doxr dae a, yarzi ssertexr zza. Mer woxrke ca maelmaerjia leil sixr i nia; goxrsol-goxrnaxr goxr nia, nael ngo nia leil guaxr dae nia, nia dder ca mel leil sixr i dae hal mel pex dae nr var.

<sup>11</sup> Ngo cirleixr dder lei du a; nia mel nia bei dae mel bei zei si nia, nia bei leixl a li wo ddo oldde leil ddexrlabox naxrcixlcixl hal ddei si leil su si lol nr ddo.<sup>w</sup> <sup>12</sup> Bei leixl su ca hazza leil lei ngo yar leil arddolcar a merhhexr gga hher lol nia, hherdder Arbosobo ddei xi gga sseigu mel sael a nga. Ngo yar ggecir leil Arbosobo ddei mi nei Arbosobo ddei zzi mi ddei vaexr deix gger nia. Zzi eil ddei mel hherdder merlabbor Arbosobo dax halmaex zei lei Yiluxlsaler yarsixl ddei nga a.<sup>x</sup> Ngo halae yoxl ngo ddei mi sixl ddei yar ggecir leil vaexr deix gger nia. <sup>13</sup> Arbosobo ddei Xiu ddei jiaxlhuixl mel leil bbeix dae ddar mel, nolba niar dae ca hazza dder noni dae nia.’ ”

### *Lardirjia Jiaxlhuixl Leil Xil Vaexr Gger*

<sup>14</sup> Yisu Zidu yoxl ngo leil bbeix: “Ni Lardirjia jiaxlhuixl ddei tisir ddei leil xil vaexr gger nia, yel yaa leil bbeix gger a bbeix:

‘Ngo mel arsae bbeix mel arsae bei ci, yarzi mel ca leil bbeix gger su hal ddei a. Ngo leil “Amae” mi. Ngo mel Arbosobo coxl teixl lei cirza-hanga leil guaxr su ddei nga a.<sup>y</sup> <sup>15</sup> Nia Lardirjia jiaxlhuixl gga

---

<sup>w</sup>**3:11** *nia bei leixl a li wo ddo oldde leil ddexrlabox naxrcixlcixl hal ddei si leil su si lol nr ddo* Halleix azo lerler birvul a bir leixl su ca mel oldde leil ddexrlabox li wo ddo.

<sup>x</sup>**3:12** *Zzi eil ddei mel hherdder merlabbor Arbosobo dax halmaex zei lei Yiluxlsaler yarsixl ddei nga a.* Qirsixlluxl Sul 21:19–22:5 leil biar dae.

<sup>y</sup>**3:14** *Ngo mel Arbosobo coxl teixl lei cirza-hanga leil guaxr su ddei nga a.* Yisu lei Arbosobo dax cirgo a cirza-hanga eil mel leil coxl. Geloxrxi Sul 1:15-16 nei Yuehal Sul 1:1-3 nei 1:10 leil biar dae.

ca mel arsae bei dae mel ngo saexl. Nia cixl zzae nr cixl, taxl zzae nr taxl lei ngo saexl. Ngo doxl nia cixl bbeixsael taxl loxia. <sup>16</sup> Nia cixl zzae nr cixl, taxl zzae nr taxl, ajjix lomersi mel sael a, yel hormo arleixr nr nga dder ngo nia leil ngo meir gga pir teixl lei nia. <sup>17</sup> Nia bbeix nia mel yarzi be, cirza-hanga lei zza, azo lei nr quexr. Nael nia mel yarzi sol, yarzi zoxlnixr ddo, sol zzae sol, mia zzae mia nr xie, halae gorni-gorlael lei nia nr saexl. <sup>18</sup> Yel ngo nia leil quex, nia ngo dax adoxlbbeix gga cu teixl lei sae naxrcixlcixl mel<sup>z</sup> vae a armael leil be lol; yoxl ngo dax pia piulpiu hal xiux vae veixr a, gorni-gorlael yarzi seixldaddo ggecir ddei leil bbe gex dae; meixddur no naxcir vae a, meixddur leil mei a mia xie lol.

<sup>19</sup> Ngo perniar dae ca mel leil mel ngo dder yaa leil bota, yaa leil mul gger. Yel nia ngo dax zabbar seilseir a bei mae dae nia, huixrsoxr nia. <sup>20</sup> Nia noni dae. Ngo ggucirmi ngier dae a alddur ae, yel arseir ngo qiurte ddei leil bbejjiur a alddur ggapu gger a mel, ngo dder ddir nia, ngo yar dax cirgo a almeixr zzor nia. <sup>21</sup> Bei leixl su ca hazza mel ngo yar leil ngo dax cirgo a ngo ddei zzirmar baxrde taex leil cux lol, hherdder ngo bei leixl a, ngabbor ngo leil yar dax cirgo a yar ddei zzirmar baxrde taex leil cux lol sael a nga. <sup>22</sup> Arbosobo ddei Xiu ddei jiaxlhuixl mel leil bbeix dae ddar mel, nolba niar dae ca hazza dder noni dae nia.’ ”

## 4

### Yuehal Merlabbor Mia

---

<sup>z</sup>**3:18** *adoxlbbeix gga cu teixl lei sae naxrcixlcixl mel* Yaa sae mel adoxl gga cu a mel sae gga ca dax dae naxr-nr-cixl hal mel cu pixl gger, yel sae mel leil ho bei ho naxrcixl lol.

## Merlabbor Hher Dae A Arbosobo Leil Bbeix Zae Gger

<sup>1</sup> Giedae, ngo yoxl merlabbor alddur ar peixl ggapu dae ggie mia a. Yel ngo halleix bbejjiur goxr cuxgexdaex baerlae mex dae lesel qiurte ddei yoxl ngo leil bbeix: “Ni eilmaex ddeix lei, ngo ni leil arddolcar a arsae lerler nga var mel saexl lol nia.” <sup>2</sup> Yel cirleixr dder Arbosobo ddei Xiu ddei ngo leil hier dae a, ngo merlabbor Arbosobo ddei baxrde taex leil mia. Baxrde taex leil mel cux su ar ddei zza. <sup>3</sup> Yar leil i dae a mel yarzi bbo yol nibaexbaex nei sseirsseilsseir bbo var balsixr nilni lesel. Baxrde taex zaza-lili mel almer seivi za gex dae, yixrsaexr ddei mel sseirsseilsseir bbo var balsixr nibaexbaex lesel. <sup>4</sup> Baxrde taex zaza-lili mel yoxl baxrde nrzei li taex zza, yel ca leil guaxr su camar nrzei liller cux dae, yaa ggecir ddei leil pia piulpiu veixr dae, oldde ddei leil sae bei teixl lei zzirmar ddexrlabox ar ddei ddexr dae. <sup>5</sup> Arbosobo ddei baxrde taex dax mel yoxl almer bbiexr dae, almer er dae, almer zaex dae. Baxrde taex xilmeir adoxl ze sir ze doxl dae, hherdder Arbosobo ddei Xiu sirler nga a.

<sup>6</sup> Baxrde taex xilmeir bbolixr sael a sseirsseilsseir neixvi ar bbe zza. Suilji sael a i bei ddo. Baxrde taex dax gol dae liller zza, yaa cingge-circir lei meixddur niar bbi jjia. <sup>7</sup> Xilmeir ddei nael hhemar lesel, nrrnel ddei nael loxrbbex lesel, soler ddei nael ca qiaxrmeix ar ddei niar dae, liller ddei nael bbiu dae zzemar lesel. <sup>8</sup> Yaa cirddeir-hanga lei ddoleixr qiuxller niar dae, cingge-circir meixddur niar bbi jjia a. Yaa mel merxixl-merni lei nr nor:

“Seirceix-seirmaer, seirceix-seirmaer, seirceix-seirmaer,  
Seirpor Arbosobo, ni mel cirza-hanga lei ddo zzir ddei nga a.  
Ni azo lei nr zza seir dder gol dae; eilleix lei gol dae;  
arddolcar a ni halae jjixr lei nia,”

eine caxl doxr dae.

<sup>9</sup> Gol dae hal liller mel Arbosobo leil middux lol, arseir lei yar leil i du, yar leil nawo eine bbeix dae a, baxrde leil cux dae cirse-cirsil lei gol dae hal ddei leil bbeix zae gger. <sup>10</sup> Halcar malmal, ca leil guaxr su camar hal nrzei liller dder baxrde taex xilmeir puxr gex dae a. Baxrde taex leil cux su cirse-cirsil lei gol dae hal ddei leil bbeix zae gger, yoxl zzirmar oldde leil ddexrlabox hal ddei lixr teixl lei a yar baxrde taex xilmeir dol a bbeix:

<sup>11</sup> “Nguia ddei Seirpor, nguia ddei Arbosobo,  
ni mel cirza-hanga bei teixl lei a;  
cirza-hanga eil mel lei ni bei a sael zza dae var,  
eilzzu leil bei a mel ni xiar dae mel sael a bei,  
yel ni larnei middux, ni larnei yarzi ddo,  
arseir lei ni leil i du a, ni leil bbeix zae gger nia.”

## 5

### Ya Ddei Vei Dae Sul Hal Jur

<sup>1</sup> Ngo mia a baxrde taex leil cux dae hal ddei leixrhher yo bbor gga sul ar jur vei dae. Sul hal jur leil mel lavul-lamae lei sul bbilbbi vaexr deix dae. Sul jur mel jur gex du lei a ddaexr kae nr cexr za sir taex niaxl gex dae. <sup>2</sup> Ngo yoxl tisir yarzi warni ar ddei mia a. Yar mel worcixl-worni bbeix dae a bbeix: “Arseir za niaxl gex dae mel vei pixl piar, arseir sul eil jur ddaexr kae piar bbeixleir?” <sup>3</sup> Nael merlabbor hher dae, middurbbor hher dae, middur zzar hher ji dae hazza lei<sup>a</sup> sul eil jur ddaexr kae a i

---

<sup>a</sup>5:3 *Nael merlabbor hher dae, middurbbor hher dae, middur zzar hher*



piar su nr zza. <sup>4</sup> Arseir lei sul eil jur ddaexr kae a i piar su nr zza a, ngo dder worcixl-worni nge du lei a. <sup>5</sup> Yel ca leil guaxr su camar mel gga ar ddei a ngo leil bbeix: “Nge nr ssa, i dae la ddo a. Yoxrdaxl ddei cuxr gga ddux lei hhemar sael a hal ddei mel hherdder Daxlweixl ddei giedae ca.<sup>b</sup> Yar mel bei leixl ho a. Yar za sir taex vei pixl piar; sul hal jur ddaexr kae piar.”

<sup>6</sup> Ngo yoxl gol dae hal liller nei ca leil guaxr su camar hal mel weixr gex dae baxrde taex dax Ya ar ddei<sup>c</sup> ngier dae ggie mia a. Ya ddei leil i dae a mel seixl zil gger goxr lesel dae. Yar mel cuxgexdaex sir baex ner dae, meixddur sir bbor niar dae. Meixddur hal sir bbor mel dder Arbosobo ddei Xiu sirler nga a. Xiu hal sirler leil zi teixl a, middurbbor cirmaex-hanga ssi lol. <sup>7</sup> Ya ddei mel xilmeir lei a, baxrde taex leil cux dae hal ddei leixrhher yo bbor gga vei dae sul hal jur zzi gel lei a. <sup>8</sup> Yar zzi gel lei car, gol dae hal liller nei ca leil guaxr su camar hal nrzei liller dder Ya ddei xilmeir puxr gex dae a. Ca leil guaxr su camar cirddeir-hanga lei yoxrcixl bbaexlabox ar ddei vei dae nei hazzi ner xiu hexzzi doxl bbi dae sae bei teixl lei ddorbax ar peixl vei dae. Hexzzi doxl dae eil mel mel dder Arbosobo ddei cassor-worssor mel yar dax ddar biar dae mel nga a. <sup>9-10</sup> Yaa dder caxlgo yarsixl ar ser caxl dae a bbeix:

“Ni leil mel seixl zil gger goxr a, yel ni sirnilni ddux a,

---

*ji dae hazza lei* Merlabbor hher su mel tisir. Middurbbor hher su mel ca. Middur zzar hher su mel ca si ho hal mel, halae neir mel leil jiujiu lei bbeix dax dae.

<sup>b</sup>**5:5** *Yoxrdaxl ddei cuxr gga ddux lei hhemar sael a hal ddei mel hherdder Daxlweixl ddei giedae ca* Cuaxlsixljil Sul 49:9, Yirsaexlyal Sul 11:1, 11:10 nei Qirsixlluxl Sul 22:16 leil biar dae.

<sup>c</sup>**5:6** *Ya ar ddei* Ya eil ddei mel dder Yisu a.

circuxr-hanga ca, ciryoxr-hanga ddar te su ca,  
cirmaex-hanga ca, cirgoxr-hanga ca armel leil bo xixl lei a,  
Arbosobo ddei ca loxr lol.

Yaa leil Arbosobo ddei goxr gga Arbosobo leil zi su bei lol a,  
niul ddei Arbosobo leil miar bei gger lol.

Yaa mel middurbbor cirza-hanga leil guaxr nia;  
yel ni sul hal jur vei piar, za niaxl gex dae hal mel vei pixl piar,”  
eine caxl dae.

<sup>11</sup> Ngo yoxl i dae a, tisir hormo du hormo meixr ddei qiurte bbejjiur a.  
Tisir mel Arbosobo cux ggie baxrde taex leil, gol dae hal liller leil, nei ca  
leil guaxr su camar mel leil weixr gex dae. <sup>12</sup> Yaa worcixl-worni caxl dae  
a bbeix:

“Seixl zil gger goxr Ya hal ddei mel yarzi ddo,  
yarzi be, yarzi olnohddu, yarzi worni,  
yarzi middux, arseir lei yar leil i du, yar leil bbeix zae gger,  
eilzzu maelmaerjgia lei yar lar li piar.”

<sup>13</sup> Ngo yoxl bbejjiur a, merlabbor hher dae, middurbbor hher dae,  
middur zzar gol dae, neixvi gga gol dae, eil mel maelmaerjgia lei yar leil  
caxl zae gger a bbeix:

“Baxrde taex leil cux dae hal ddei leil nei Ya ddei leil mel  
cirse-cirsil lei bbeix zae gger nia, arseir lei yaa leil i du nia,  
yaa leil middux lol nia, quexrlxl zza lol nia.”

<sup>14</sup> Gol dae hal liller dder ddarkoxl a bbeix: “Amae!” Ca leil guaxr su  
camar mel dder puxr gex dae a yaa leil bbeix zae gger.

## Arbosobo Ca Mel Leil Faxr

### Za Sir Taex Niaxl Gex Dae

#### *Za Niaxl Gex Dae Mel Qiuxl Taex Vei Pixl*

<sup>1</sup>Ya ddei mel za niaxl gex dae hal sir taex vei pixl, yar xilmeir hal taex vei pixl car a ngo mia a. Ngo yoxl bbejjiur a gol dae hal liller gga ar ddei a almer er sael a ae dae a bbeix: “Ddux lei ddo a!” <sup>2</sup>Ngo arleixr i a dder mur piulpiu ar ddei mia a; mur zzaer su ddei mel jierddaexrlabox ar ddei vei dae. Yar leil mel zzirmar oldde leil ddexrlabox ar ddei gger a, yar dder zaxlddaexr ssi a. Yar ddaexr ho a, yoxl ddaexr a, ddaexr leixl niazzir.

<sup>3</sup>Ya ddei za niaxl gex dae nr taex ddei vei pixl car a, ngo bbejjiur a gol dae hal liller gga nnel ddei bbeix: “Ddux lei ddo a!” <sup>4</sup>Ngo dder mur nilni ar ddei ddux lei ggie mia a. Mur zzaer su ddei mel quexrlixl li wo a; yel middurbbor ca mel leil zzicarzzi dax toltor a nr bei lol, zzicarzzi leil seixl lol. Yar yoxl altor darsisimo ar baex li wo a.

<sup>5</sup>Ya ddei za niaxl gex dae so taex ddei vei pixl car a, ngo bbejjiur a gol dae hal liller gga soler ddei bbeix: “Ddux lei ddo a!” Ngo arleixr i a dder mur neixlneix ar ddei mia a. Mur zzaer su ddei mel cex ar baxr vei dae.

<sup>6</sup>Ngo yoxl gol dae hal liller dax qiurte me teixl lei sael a bbejjiur a bbeix: “Cir ni ddei worper lei so cir zi sael a vae wo ddo, cir ni ddei worper lei ssu so zi sael a vae wo ddo; ssuvi nei puxrto zzipbaer lei bei holpixl nr ddo.”

<sup>7</sup>Ya ddei za niaxl gex dae li taex ddei vei pixl car a, ngo yoxl bbejjiur a gol dae hal liller gga liller ddei bbeix: “Ddux lei ddo a!” <sup>8</sup>Ngo arleixr i a,

ngo dder mur nibaexbaex ar ddei mia a. Mur zzaer su ddei leil mel “Caseixlsu” eine mi; Yijie<sup>d</sup> ddei yar dax mae dae. Arbosobo yaa leil quexrlixl gger a, yaa middurbbor ca li fel leil ar fel seixl zil gger. Yaa altor darsisi sser a seixl zil gger, meixr zil lol, nogiel no si lol, halae cinil mel leil kexl zil lol eine bei.

<sup>9</sup> Ya ddei za niaxl gex dae ngor taex ddei vei pixl car a, ngo xiu cirke mia a. Xiu eil mel mel Arbosobo ddei ddar mel ca leil biar gger, halae Yisu arseir a ca leil biar gger a, si yaa leil seixl zil gger ca hal mel ddei xiu a. Xiu eil mel mel Arbosobo leil zi ggie woxrke hher dae. <sup>10</sup> Yaa dder worcixl-worni ae dae a bbeix: “Seirpor, ni mel seirceix-seirmaer, ni arsae bbeix ci mel dder arsae bei ci. Ni arddolcar a saelnei middurbbor ca mel leil bbaehhexhhex a serpaxl a, ngua leil seixl zil gger su mel leil bei koxl xixl neil?” <sup>11</sup> Ddar bbeix su ar ddei a bbeix, yaa leil arleixr xia dae lol seir, Seirpor leil visser su nei Yisu leil ddarzzi su armel leil lei seixl zil gger nia seir. Arbosobo dixl har dae mel miumiu seixl wo xia ci nia. Yaa cirddeir-hanga leil lei pia piulpiu darsisimo ar xiux gger a.

<sup>12</sup> Ngo yoxl Ya ddei za niaxl gex dae qiuxl taex ddei vei pixl ggie mia a. Halcar a malmal middur ddei lelelle le du lei a; merni taex lei mae neix sael a neixmarmarmo loxr a; xiubbo cirtaex-lorbba sirnilni sael a nisirsirmo loxr a. <sup>13</sup> Gie mel lei merlabbor cirdae a middurbbor de zei lei a; hherdder mersi daxlgaxl jia a, vuxrhuagol nr mi seir hal mel leil yarzzei ddei leil jia zei lei sael a nga. <sup>14</sup> Merlabbor ddei lei sul sael a jur gex du lei a, nr mia a. Worga nei neixvi gga dal cirtaex-hanga lei kebal le mal si a.

<sup>15</sup> Yel middurbbor zzirmar mel, ca leil guaxr su mel, meixr leil guaxr su mel, zzirbae be su mel, quexrlixl zza su mel, zebol mu su mel nei armael lo zza su mel, maelmaerjjia lei worga suddu nei legelbbe dax pahher du

---

<sup>d</sup>**6:8** *Yijie* “Yijie” ddei yilsi mel dder ca si ho a xiu ddei hher ggie nga a.

lei a. <sup>16</sup> Yaa worga nei legelbbe mel leil ae dae a bbeix: “Ngua leil nixl hex lei a, ngua leil bbe gex du la, eine nga a mel ngua dder baxrde taex leil cux su hal ddei qiaxrmeix ddei leil pahher dae cexr a; halae Ya ddei sirzzi a ca leil ser car lei pahher dae cexr a. <sup>17</sup> Yaa sirzzi a, ca leil ser nixixl yarzi larhor hal ni ci a mel arseir yaa meixsaer qier leil ngier ver xie bbeixleir?”

## 7

### *Yirsaexllixl Su Ca Ceili Meixr Lidu*

<sup>1</sup> Giedae ngo yoxl tisir liller a middurbbor li piar a gga ngier dae ggie mia a. Yaa mel li piar a gga mersi jia mal lei mel leil bbiur gex dae a, middurbbor, neixvi, nei sixzzei mel dax jia nr mal lei lol. <sup>2</sup> Tisir eil liller mel Arbosobo yaa leil quexrlixl gger a, middurbbor nei neixvi mel leil bei xiaxr gger cexr. Ngo yoxl kebal tisir ar ddei mia a. Yar mel cirse-cirsil lei gol dae Arbosobo ddei za taex vei dae a dofa piar a gga ddeix lei a. Yar tisir hal liller leil worcixl-worni ae dae a bbeix: <sup>3</sup> “Nia middurbbor, neixvi, nei sixzzei mel leil tor bei xiaxr nr gger seir, ngua niul ddei Arbosobo leil miar bei gger su ca mel ngergazo ddei leil za arleixr giexl deix gger seir.” <sup>4</sup> Ngo bbejjiur a bbeix: Yirsaexllixl su ca circuxr-hanga gga za giexl deix wo maelmaerjjia a mel 144,000 zza.

<sup>5</sup> Yoxrdaxl ddei cuxr gga za giexl deix wo ca mel 12,000 zza,

Liurbil ddei cuxr gga lei 12,000 zza,

Jiadaexr ddei cuxr gga lei 12,000 zza,

<sup>6</sup> Yalsaexl ddei cuxr gga lei 12,000 zza,

Naxrfuxrtalil ddei cuxr gga 12,000 zza,

Marnaxrsi ddei cuxr gga lei 12,000 zza,

<sup>7</sup> Simixl ddei cuxr gga lei 12,000 zza,

Lixlweixl ddei cuxr gga lei 12,000 zza,  
Yirsarjia ddei cuxr gga lei 12,000 zza,  
<sup>8</sup> Xibulluixr ddei cuxr gga lei 12,000 zza,  
Yuesaexl ddei cuxr gga lei 12,000 zza,  
Bixlyarmir ddei cuxr gga za giexl deix wo ca mel lei 12,000 zza.

*Ca Seirseil Ar Ke A Bbeix Zae Gger Lei*

<sup>9</sup> Giedae ngo arleixr i a, ngo yoxl ca seirseil ar ke mia a; hhe lei hhe jjia nr ddo. Ca eil mel mel cirgoxr-hanga, circuxr-hanga, cirmaex-hanga, ciryoxr-hanga ddar te su mel gga lei. Yaa maelmaerjjia baxrde taex leil cux su ddei xilmeir nei Ya ddei xilmeir ngier dae. Pia piulpiu darsisimo ar xiux veixr dae, leixrhher gga jji peixl lesel armel vei dae a,  
<sup>10</sup> worcixl-worni ae dae a bbeix:

“Baxrde taex leil cux dae Arbosobo nei Ya ddei mel dder ngua leil  
jiuxlsu a.”

<sup>11</sup> Tisir maelmaerjjia lei Arbosobo ddei baxrde taex leil, ca leil guaxr su camar mel leil, halae gol dae hal liller leil weixr gex dae a ngier dae, yel yaa cirke-lorbba Arbosobo ddei baxrde taex xilmeir puxr gex dae a Arbosobo leil bbeix zae gger a <sup>12</sup> bbeix:

“Amae!  
Nguua ddei Arbosobo leil mel  
bbeix zae gger nia, middux lol nia, nawo nia;  
yar mel olnolddu, worni, yarzi ddo,  
arseir lei yar leil i du nia;  
cirse-cirsil eine nga nia!  
Amae!”

<sup>13</sup> Giedae yoxl ca leil guaxr su camar ar ddei a ngo leil biex a bbeix: “Pia piulpiu darsisi veixr su eil mel arseir a? Yaa arddolmaex gga lei?”

<sup>14</sup> Ngo ddarkoxl a bbeix: “Seirpor, ni saexl.” Yar dder ngo leil bbeix gger a bbeix: “Ca eil mel mel goxrsol-goxrnaxr gga goxr si lei hal mel nga a. Yaa mel Ya ddei sirnilni sser a armael pia darsisi xiux piu taexltaexlmo cir mal ho a. <sup>15</sup> Eine nga a

yaa dder Arbosobo ddei baxrde taex xilmeir ngier dae a,  
merxixl-merni lei Arbosobo ddei xi gga hher dae a yar leil visser.  
Baxrde taex leil cux su Arbosobo ddei yaa leil guaxr nia.

<sup>16</sup> Yaa mel zeixleixr lei meixr nr var, zeixleixr lei sixl nr var,  
merni taex lei yaa leil lexl no gger nr var,  
yarzi taxl hal mel lei yaa leil taxl no gger nr var.

<sup>17</sup> Arbosobo ddei baxrde taex dax hher dae Ya ddei mel  
yaloxlmo sael a yaa leil guaxr;  
yaa leil cirse-cirsil olga zza lol var lur ddux ggie halmaex hier mal,  
Arbosobo halae yaa cirddeir-hanga ddei meixbbix  
cirtaex-hanga lei six hie gger nia.”

## 8

### *Za Niaxl Gex Dae Sir Taex Ddei Vei Pixl*

<sup>1</sup> Ya ddei za niaxl gex dae sir taex ddei vei pixl car a, merlabbor mel arjjiuljjiumo baxlgoxl xiarsixr sael nga a. <sup>2</sup> Yel ngo Arbosobo xilmeir ngier dae tisir sirler mia a. Yaa leil mel baerlae sirler gger a.

<sup>3</sup> Yoxl kebal tisir ar ddei lei a Arbosobo leil zi ggie xilmeir ngier dae. Yar mel hazzi ner xiu hexzzi doxl ji ddu sae bei teixl lei odessor ar taex vei dae. Yar leil hexzzi cirke gger a, yar Arbosobo leil zi ggie deix gger a.

Yar halae Arbosobo ddei cassor-worssor mel, Arbosobo dax ddar biar dae mel lei halmaex deix gger a. Sae bei teixl lei Arbosobo leil zi ggie eil ddei mel, Arbosobo ddei baxrde taex xilmeir dol dae. <sup>4</sup> Hexzzi doxl a alker sil teixl lei dae mel nei Arbosobo ddei cassor-worssor mel yar dax biar dae ddar mel, tisir ddei leixrga gga cirdae a Arbosobo meixsaer gier leil ddeix ci a. <sup>5</sup> Tisir ddei yoxl Arbosobo leil zi ggie halmaex ddei adoxl mel odessor taex gga ji bbi a, middurbbor piar ze i gger a. Yel dder almer zaex, almer er, almer bbiexr nei mi lei a.

### **Baerlae Sirlar**

#### *Xilmeir Tisir Hal Ddei Baerlae Mex*

<sup>6</sup> Giedae baerlae sirlar vei dae tisir hal sirlar mel mex du a. <sup>7</sup> Xilmeir tisir hal ddei baerlae mex car a, wortaxlaex, adoxl nei sirnilni mel dder sixlix-xiuxlox middurbbor de ze i lei a. Yel middur so fel ddei gga ar fel nei sixzzei so fel ddei gga ar fel cu pixl gger a. Middur leil silbbar nibaexbaex maelmaerjia lei cu pixl gger a.

#### *Tisir Nrnal Ddei Baerlae Mex*

<sup>8</sup> Tisir nrnal ddei baerlae mex car a, adoxl bbiu dae worga lesel vaervaermo ar ga leil neixvi gga piar ji gger a. Yel neixvi mel so fel ddei gga ar fel a sirnilni loxr a. <sup>9</sup> Neixvi gga hher ji dae ha olga zza mel dder so fel ddei gga ar fel si a; cuaxr mel lei so fel ddei gga ar fel xiaxr a.

#### *Tisir Soler Ddei Baerlae Mex*

<sup>10</sup> Tisir soler ddei baerlae mex car a, gie vaervaermo ar taex a, adoxl ze mel sael a merlabbor de ze i lei a. Yel lazzarmo so fel ddei gga ar fel nei lur ddux ggie mel gga de ji a. <sup>11</sup> Gie eil taex leil mel “Karmarmer” mi. Yel gie eil taex ajjix gga de ze i ho a, ajjix mel so fel ddei gga ar fel a mel karmarmermo loxr a, ca cirke a mel ajjix kar eil mel dda a si a.



### *Tisir Liller Ddei Baerlae Mex*

<sup>12</sup> Tisir liller ddei baerlae mex car a, merni, xiubbo halae gie mel so fel gga ar fel leil deil a. Yel merni, xiubbo halae gie mel dder so fel ddei gga ar fel nr bbo a. Eilnirggu lei so fel ddei gga ar fel bbe nr le a; eilmerxixl lei so fel ddei gga ar fel bbe nr le a.<sup>e</sup>

<sup>13</sup> Ngo yoxl merlabbor bbiu dae zzemar ar ddei mia a. Yar worcixl-worni ae dae a bbeix: “Halae tisir soler a mel baerlae mex nia seir, yel Zoxr a! Zoxr a! Middurbbor ca mel lei zoxr a!”

## 9

### *Tisir Ngorler Ddei Baerlae Mex*

<sup>1</sup> Tisir ngorler ddei baerlae mex car a, ngo gie ar taex<sup>f</sup> a merlabbor cirdae a middurbbor de zei lei ggie mia a. Yar mel suddu yarzi neixl hal ddei<sup>g</sup> ddei zzuxci ci vei wo a. <sup>2</sup> Yel yar dder suddu yarzi neixl hal ddei ggapu gger a, alker kersil-kerbbax sil teixl lei a. Hherdder adoxlbbeix yarzi vaer mel gga alker sil teixl lei dae mel sael a nga. Alker sil teixl lei a merni nei merlabbor ddei lei neixmar a. <sup>3</sup> Alker mel gga zaxbiul armel<sup>h</sup> bbiu teixl lei a middurbbor nor dae a. Zaxbiul mel quexrlixl li wo a,

---

<sup>e</sup>**8:12** *Eilnirggu lei so fel ddei gga ar fel bbe nr le a; eilmerxixl lei so fel ddei gga ar fel bbe nr le a* Yilsi mel dder eilnirggu sixlgoxl xiarsixr bbe-nr-le; eilmerxixl lei sixlgoxl xiarsixr bbe nr le.

<sup>f</sup>**9:1** *gie ar taex* Gie eil taex mel tisir ar te a.

<sup>g</sup>**9:1** *suddu yarzi neixl hal ddei* Ca cirmelmel a zzir dae a suddu eil ddei mel middur zzar hher ji dae. Neir cirmelmel a halmaex gga hher dae. Luxljia Sul 3:31 leil biar dae. Arddolcar a Sardaxl te leil halmaex gga cirdu koxl ge nia. Qirsixlluxl Sul 20:3 leil biar dae.

<sup>h</sup>**9:3** *zaxbiul armel* Zaxbiul mel mel neir armel a.

hherdder middurbbor bberzzi yarzi duxr mel sael a nga, ca mel leil bei no gger xie. <sup>4</sup> Nael yaa leil miardal goxr a, silbbar, ciryoxr-hanga sixzzei nei cirza-hanga yarzzei mel leil bei xiaxr gger nr ddo. Ngergazo leil Arbosobo ddei za giexl nr deix dae ca mel leil lar bei no gger ddo.

<sup>5</sup> Zaxbiul mel ca mel leil yarzi goxr sol ngor xiubbo goxr lol bbesur zza arnar, yaa leil bei zil gger bbesur nr zza. Nael yarzi goxr sol hal ngor xiubbo gga mel hherdder bberzzi yarzi duxr mel yaa leil zix dae mel sael a nga. <sup>6</sup> Hal ngor xiubbo gga mel ca mel si niazzir a lei nael si zzael si nr xie.

<sup>7</sup> Zaxbiul eil mel leil i dae a mel, ca zzaer deix dae a zaxlddaexr ssi niazzir dae mur mel sael a nga. Yaa sae bei teixl lei oldde leil ddexrlabox hal mel sael a ar ddei ddexr dae. Yaa qiaxrmeix ddei nael ca qiaxrmeix lesel, <sup>8</sup> olce mel nael ssormaer ddei olce lesel, ser mel nael hhemar ddei ser lesel. <sup>9</sup> Yaa nixmoxzo ddei leil he bei teixl lei sael a ar co veixr gex dae. Yaa ddoleixr ddei dax mel, mur cirke nei marcae cirke a zaxlddaexr ggie beix mal mel sael a me teixl lei dae. <sup>10</sup> Yaa halae bberzzi yarzi duxr mel sael a maeldae niar dae, maeldae ddei leil teixvilvilmo zixladox ar baex niar dae. Maeldae eil ddei mel dder ca leil no zildu ngor xiubbo no lol ddei nga a. <sup>11</sup> Zaxbiul mel leil mel guaxr su zzirmar ar ddei zza. Yar mel dder yarzi neixl suddu leil guaxr su tisir ddei nga a. Tisir eil ddei leil Xiboxrlaexr ddar nael “Yalbaduixl” mi, Xilaxl ddar nael “Yalboluixr” mi.<sup>i</sup>

<sup>12</sup> Yarzi goxr sol mel ar boxl goxr jixr ho a; nael halae nr boxl goxr nia seir.

### *Tisir Qiuxller Ddei Baerlae Mex*

---

<sup>i</sup>**9:11** *Xiboxrlaexr ddar nael “Yalbaduixl” mi, Xilaxl ddar nael “Yalboluixr” mi.* Yalbaduixl nei Yalboluixr ddei yilsi mel dder bei xiaxr gger su ddei nga a.

<sup>13</sup>Tisir qiuxller ddei baerlae mex car a, ngo yoxl Arbosobo xilmeir dol dae a sae bei teixl lei yar leil zi ggie ddei dax qiurte me teixl lei ggie bbejjiur a. <sup>14</sup>Yel baerlae mex su tisir qiuxller ddei leil bbeix: “Yofaladir lazzarmo vaervaer hal zex gga ge ji dae tisir hal liller leil piur teixl la,” eine bbeix a. <sup>15</sup>Tisir hal liller leil dder piur teixl lei a. Arbosobo mel arddol-cirsil dder yaa leil miardal har ho a, yel hal koxl gga hal xiux gga hal cir ni halcar a malmal ci a saelnei ca maelmaerjjia leil so fel ddei gga ar fel bei zil gger. <sup>16</sup>Ngo yoxl bbejjiur a bbeix, yaa mel mur zzaer su meixr dder nr yixl zza.

<sup>17</sup>Ngo meixcir mia a mur nei mur zzaer su mia mel eine a. Mur zzaer su mel nixmoxzo ddei leil veixr dae he co mel, nilni mel zzae adoxl sael a ni, laxllaxr mel zzae balsixr laxllaxr sael a laxr, saelsae mel zzae liuxrhuaxr sael a sae. Mur oldde ddei mel hhemar oldde lesel. Mur meir ddei gga mel adoxl, alker nei liuxrhuaxr mex teixl lei dae, <sup>18</sup>yel mur meir gga mex teixl lei dae adoxl, alker nei liuxrhuaxr eil so yoxr middurbbor ca maelmaerjjia leil so fel ddei gga ar fel leil bei zil gger a. <sup>19</sup>Mur maeldae ddei nei mur meir ddei mel yarzi sexr. Mur maeldae ddei mel sae ar te lesel, halae oldde ar taex niar dae. Yaa mel dder oldde eil taex sser a ca mel leil bei no gger.

<sup>20</sup>Yarzi goxr sol eil mel goxr a lei nr si kebal ca mel mel halae huixr-nr-soxr. Yaa mel halae piu, sae, zzir, legelbbe nei six sser a armael bei teixl lei bbex mel piar nr pixl, neir leil zi nei bbex leil zi. Bbex eil mel mel mia lei mia nr xie, bbe lei bbejjiur nr xie, ssi lei ssi nr var.

<sup>21</sup>Ca eil mel mel ca seixl, neir bei, kerjjar, zzaegu ker zuixl eil mel bei a lei halae huixr-nr-soxr.

## 10

*Tisir Nei Sul Yelye Jur Leil Biar*

<sup>1</sup> Ngo yoxl kebal tisir yarzi worni ar ddei a merlabbor zeil lei ggie mia a. Yar mel zico ar co wol dae, yar oldde ddei ggaxrne mel almer seivi zza. Yar qiaxrmeix ddei mel merni lesel, qihher ddei mel adoxl bbiu dae sseigu lesel. <sup>2</sup> Yar qihher yo bbor nael neixvi teixl lei toxl gex dae, qihher vael bbor nael middur leil toxl gex dae. Yar leixrhher gga ddaexr kae dae sul yelye ar jur vei dae. <sup>3</sup> Yar worcixl-worni ae du lei a mel dder hhemar me dae sael a nga. Yar ae du lei car a almer sir taex zaex a.<sup>j</sup>

<sup>4</sup> Almer sir taex zaex a bbeix dae ddar mel ngo vaexr zeil lei niazzir dae a car, merlabbor zeil lei qiurte ar ddei a ngo leil bbeix: “Almer sir taex zaex a bbeix dae ddar mel ni vaexr zeil lei nr ddo, ca leil saexl lol nr ddo,” eine bbeix a.

<sup>5</sup> Eine goxr ho a, ngo yoxl neixvi teixlleil nei middur leil ngier dae tisir hal ddei leil mia a. Yar mel leixrhher yo bbor merlabbor mal dae a bil du lei a. <sup>6</sup> Yar merlo-milo, neixvi nei cirza-hanga coxl su cirse-cirsil lei gol dae Arbosobo ddei mi ddei bbeix dae a bbeix: “Zeixleixr lei da nr wo a. <sup>7</sup> Tisir sirlar ddei baerlae mex car, Arbosobo dder yar leil miar bei gger su xiezi mel dax bbeix har zaxr goxr halleix ca mel leil nr saexl lol mel bei jjia a.”

<sup>8</sup> Giedae ngo yoxl xilmeir ngo bbejjiur goxr merlabbor zeil lei qiurte hal ddei leil bbejjiur a bbeix: “Ni gger a neixvi teixlleil nei middur leil toxl gex dae tisir hal ddei leixrhher gga vei dae ddaexr kae dae sul yelye hal jur vei gel la.”

<sup>9</sup> Ngo dder gger a tisir hal ddei leil qie a, sul yelye hal jur ngo leil gger lol. Yar ngo leil bbeix: “Vei si a zzor ji. Ni zzor dae car meir gga bbiurvi sael a ci var, nael zzor ji ho a xilbe zzar kar var,” eine bbeix a. <sup>10</sup> Ngo dder yar leixrhher gga sul yelye hal jur vei si lei a zzor ji a. Ngo zzor dae

---

<sup>j</sup>**10:3** *Yar ae du lei car a almer sir taex zaex a.* Almer zaex dae ddei mel dder ddar bbeix dae sael a nga. Sipi Sul 29:3-9 leil i ssi.

car a meir gga yarzi bbiurvi sael a ci, nael zzor ji ho a yarzi xilbe zzar kar a.

<sup>11</sup> Tisir hal ddei yoxl ngo leil bbeix: “Ni zeixleixr circuxr-hanga ca, cirgoxr-hanga ca, ciryoxr-hanga ddar bbeix su ca nei zzirmar mel leil yaa arddolcar a arsae lerler nga var hal mel bbeix gger nia.”

## 11

### *Arbosobo Ddei Ddar Ca Leil Biar Gger Su Ca Nrnal*

<sup>1</sup> Ngo leil mel liaxrlabox zzargger ar caex gger a. Yel qiurte ar ddei a ngo leil bbeix: “Ni ha du la a, Arbosobo ddei xi nei Arbosobo leil zi ggie arleixr liaxr, Arbosobo leil zi su ca mel leil arleixr hhe. <sup>2</sup> Nael Arbosobo ddei xi lamaebbaer zzaexggu ddei mel Yoxrtaexl su nr nga ca mel leil gger ho a. Yaa mel Arbosobo ddei zzi hherdder Yiluxlsaler zzi ddei leil 42 xiubbo bei vuxryixr lei nia, yel ni zzaexggu eil ddei leil liaxr nr ddo.

<sup>3</sup> Halae ngo zzir pia veixr dae ca nrnal leil quexrlixl gger a ngo ddei ddar mel ca leil biar gger ssi lol nia. <sup>k</sup> Yaa nrnal mel ca mel leil 1260 ni biar gger nia,” eine bbeix a.

<sup>4</sup> Arbosobo ddei ddar ca leil bbeix gger su ca hal nrnal mel, mer woxrke ddei Seirpor ddei xilmeir ngier dae. Yaa mel dder saercor zzei hal nr zzei nei de hal nr zar nga a. <sup>l</sup> <sup>5</sup> Ca mel yaa leil bei no gger niazzir arddeirnga a mel, yaa dder meir gga adoxlle mex teixl lei a yaa leil vuxryixr su ca mel leil cu pixl gger. Ha yaa leil bei no gger niazzir su mel leil mel dder eil mel sael a eine bei zil gger. <sup>6</sup> Yaa Arbosobo ddei ddar

---

<sup>k</sup>**11:3** Yaa zzir pia veixr a mel yaa zzir dae a middurbbor ca mel yarzi zuixl neil huixrsoxr nia. Nr nga a Arbosobo yaa leil faxr lei a.

<sup>l</sup>**11:4** *Yaa mel dder saercor zzei hal nr zzei nei de hal nr zar nga a.* Sarjialixlyal Sul 4:1-3 nei 4:11-13 leil biar dae.

mel ca leil biar gger dae nixixl ddei gga, yaa merlabbor ddei ggabil gger quexrlixl zza, yel almer nr lei lol. Yaa yoxl ajjix hazza leil guaxr quexrlixl zza, yel ajjix mel leil sirnilni loxr lol. Yaa halae arddolcar middurbbor cirza-hanga goxrsol-goxrnaxr goxr lol niazzir yaa dder goxr lol quexrlixl zza.

<sup>7</sup> Yaa nnel Arbosobo ddei ddar mel ca leil bbeix gger jjia ho a, yarzi neixl suddu gga ddux lei yarzi gexrddo cinil hal ddei dder yaa dax zaxlddaexr lei a, yel yaa nnel leil ddaexr leixl gger nia, halae yaa leil seixl zil gger nia. <sup>8</sup> Yaa ddei ggecir ddei zzi vaervaer gga zzijiul ar zex gga piar dol gger a. Zzi eil ddei mel Sordomar bbeixsael Aezixr bbeix cexr, hherdder yaa ddei Seirpor ddei leil sixrxixljiaxl leil diexr ngexl ggie nga a.<sup>m</sup> <sup>9</sup> Circuxr-hanga ca, cirmaex-hanga ca, ciryoxr-hanga ddar te su ca, cirgoxr-hanga ca mel yaa ggecir ddei leil so ni peix igax nia. Arseir leil lei yaa ggecir ddei leil giexl-nr-hex lol. <sup>10</sup> Xiezi eil nnel mel middurbbor ca mel leil goxrsol-goxrnaxr cirke goxr lol goxr a. Yel yaa si a mel, middurbbor hher dae ca mel dder yarzi sael ggese, zzi dax cirgo a gaxggor, halae zzicarzzi leil zzaegu ho. <sup>11</sup> So ni peix goxr ho a, Arbosobo mel olga zza seixl ar gur leil yaa ggecir gga ddir lol, yaa dder ngier du lei a. Mia su ca mel lei gexr zildu a. <sup>12</sup> Xiezi hal nnel mel merlabbor lei qiurte vaervaermo ar ddei bbejjiur a yaa leil bbeix: “Nia eilbbor ddeix lei,” eine bbeix a. Yaa dder yaa leil vuxryixr su mel meixsaer qier leil zico leil ngier dae a, merlabbor ddeix a. <sup>13</sup> Halcar malmal middurbbor dder mi lei a yarzi lei vaer, yel zzi hal ddei dder cei fel ddei gga ar fel de zei a, ca sirdu si a. Gol dae seir ca mel lei gexr zildu a dder merlabbor hher dae Arbosobo leil bbeix zae gger a.

---

<sup>m</sup>**11:8** *Zzi eil ddei mel Sordomar bbeixsael Aezixr bbeix cexr, hherdder yaa ddei Seirpor ddei leil sixrxixljiaxl leil diexr ngexl ggie nga a* Zzi eil ddei mel Yiluxlsaler zzi ddei nga a.

<sup>14</sup>Yarzi goxr sol nr boxl ddei mel goxr jixr ho a; halae yarzi goxr sol so boxl ddei lei cirleixr dder goxr du a.

*Tisir Sirlar Ddei Baerlae Mex*

<sup>15</sup>Tisir sirlar ddei baerlae mex car a, merlabbor qiurte vaervaermo armel a bbeix:

“Niul Seirpor nei yar tiur har dae Zidu ddei mel,  
middurbbor cirgoxr-hanga leil guaxr quexrlixl zza ho a.  
Yar mel cirse-cirsil lei maelmaerjia leil guaxr nia.”

<sup>16</sup>Arbosobo xilmeir baxrde leil cux dae, ca leil guaxr su camar hal nrzei liller mel middur ddei leil puxr gex dae a Arbosobo leil bbeix zae gger a

<sup>17</sup>bbeix:

“Azo lei nr zza seir dder gol dae,  
eilleix lei gol dae ddo zzir Seirpor Arbosobo,  
ni mel ni ddei quexrlixl mel sser a,  
cirza-hanga leil guaxr jiur a,  
yel ngua ni leil nawo a.

<sup>18</sup>Cirgoxr-hanga lei ni leil yarzi seifu faex,  
nael ni lei sirzzi a ca mel leil serpaxl zi ci a;  
ni si ho ca mel leil serpaxl lei a.

Ni leil visser su xiezi mel,  
nei ni leil ddarzzi su ca mel,  
halae ni leil i du ni leil gexr su ca mel,  
yaa quexrlixl zza bbeixsael nr zza lei  
yaa li wo ddo seirseir mel, ni yaa leil gger.

Middurbbor bei xiaxr gger su mel leil nael<sup>n</sup>  
ni lei yaa leil bei xiaxr gger,”

eine bbeix a.

<sup>19</sup> Halcar a malmal merlabbor Arbosobo ddei xi ddei dder ggapu a, Arbosobo ddei xi gga dol dae bbezzir<sup>o</sup> ddei leil mia ddo. Yel dder almer bbiexr no bbiexr, er no er, zaex no zaex, mi lei no lei, halae wortaeplaex vaervaer lei no lei.

## 12

### Murgurgurmo Sir Yoxr Ddux Lei

#### *Ssormaer Nei Lursae Ddei Leil Biar*

<sup>1</sup> Ngo yoxl merlabbor yarzi sael murgur ar ddei ddux lei ggie mia a. Ssormaer ar ddei zza. Yar mel merni taex nael yar veixr dae, xiubbo taex leil nael yar jjiux gex dae, yar oldde ddei leil nael oldde leil ddexrlabox yarzi naxrcixl ar ddei ddexr dae. Hal ddei leil mel gie ceinir taex niar dae. <sup>2</sup> Yar xiu mu niazzir dae a, nolir ae dae a.

<sup>3</sup> Merlabbor gga yoxl murgurgurmo ar ddei ddux lei a. Lursae nilni vaervaermo ar ddei zza. Yar mel oldde sir taex niar dae, cuxgexdaex cei baex ner dae. Yar oldde cirtaex-hanga leil lei zzirmar oldde ddei leil ddexrlabox ar ddei ddexr dae. <sup>4</sup> Yar maeldae ddei mel merlabbor gie mel so fel ddei gga ar fel leil middurbbor veil zei gger a. Yar mel xiu mu niazzir dae ssormaer hal ddei xilmeir ngier dae a, yel aniu x ddox leil xiu

---

<sup>n</sup>**11:18** *Middurbbor bei xiaxr gger su mel leil nael* Yaa mel middurbbor lar bei xiaxr gger nr nga a nei ca mel leil lei bei zil gger.

<sup>o</sup>**11:19** *bbezzir* Xiboxrlaexr Sul 9:4 nei Cu'aezixr Sul 25:10-22 bbezzir ddei arddolyox ar ddei a biar dae.



teixl lei a gie, yar dder ixl ji niazzir dae. <sup>5</sup> Ssormaer eil ddei mel ssor ar ddoxr xiu wo a. Ssor eil ddox mel dder he zzargger sser a, circuxr-hanga leil guaxr su ddei nga a.<sup>p</sup> Yar leil merlabbor Arbosobo ddei baxrde taex dax zi deix si a. <sup>6</sup> Ssormaer hal ddei dder mipaerbbae gga pa mal a, Arbosobo yar leil bei har zaxr gger ggie lei ci a. Yar halmaex gga hher dae a mel yar leil 1260 ni guaxr su zza.

<sup>7</sup> Giedae merlabbor zaxlddaexr a. Tisir vaer zzir mel gga Mirjialexl mi hal ddei nei yar ddei tisir mel dder lursae te leil ddaexr ssi a. Lursae te nei yar ddei tisir<sup>q</sup> mel lei yaa leil ddaexr koxl xixl a. <sup>8</sup> Nael lursae te nei yar ddei tisir mel ddaexr nr wor a. Yel yaa dder merlabbor hher wo nr ddo a. <sup>9</sup> Lursae vaervaer eil te leil dder middurbbor piar zeigger a. Yar mel halcar tortor dder zza dae sae te nga a. Yar leil Sardaxl ae, yar leil yoxl neir zzirmar lei ae. Yar mer woxrke ca maelmaerjjia leil fur su te nga a. Yar leil nei yar ddei tisir mel leil cirgo a middurbbor piar zeigger a.

<sup>10</sup> Ngo yoxl merlabbor qiurte vaervaermo ar ddei bbejjiur a bbeix:

“Eilcar mel dder Arbosobo ca leil jiuxl zi ci a.

Arbosobo mel yarzi ddo,  
yar cirza-hanga leil guaxr dae ho a.

Yar tiur har dae Zidu ddei lei yar ddei quexrlixl mel sser a,  
cirza-hanga leil guaxr dae ho a.

Sardaxl te mel merxixl-merni lei Arbosobo dax hher dae a,

---

<sup>p</sup>**12:5** *Ssor eil ddox mel dder he zzargger sser a, circuxr-hanga leil guaxr su ddei nga a.* Sipi Sul 2:9 leil vaexr dae.

<sup>q</sup>**12:7** *Lursae te nei yar ddei tisir* Lursae dax cir piar a bei su tisir mel halleix Arbosobo cirza-hanga coxl tor mel seir armel a; giedae nr seir loxr a.

niul ddei arzzi-nimar arzzi-nimo mel leil goxl,  
nael yar leil mel middurbbor piar zeil gger a.

<sup>11</sup> Niul ddei arzzi-nimar arzzi-nimo mel

Ya ddei sirnilni ddei leil koxl dae nei yaa bbeix dae ddarzi mel leil  
koxl dae a,

lursae te leil bei leixl gger a.

Yaa mel Yisu leil weix a si lei si yuex.

<sup>12</sup> Yel nia merlabbor hher dae mel yarzi sael ggeise nia.

Nael neir zzirmar te mel yar hormo arleixr hher wo nr ddo a saexl  
ho a dder,

sirzzi zildu a middurbbor zeil lei a.

Yel middurbbor nei neixvi mel zoxr a!”

eine bbeix a.

<sup>13</sup> Lursae hal te mel yar leil middurbbor piar zeil gger lei ho a saexl a  
dder, ssor ar ddoxr xiu goxr ssormaer hal ddei leil ggaxr deil ssi. <sup>14</sup> Nael  
ssormaer hal ddei leil mel zzemar vaervaermo ar ddei ddei ddoleixr  
nrnel gger a, yel yar mipaerbbae gga bbiu mal, yar leil bei har gger ggie  
halmaex ssi. Halmaex gga mel yar leil so koxl peix<sup>s</sup> guaxr su zza, yel sae  
hherdder lursae te yar leil deil lei nr cexr. <sup>15</sup> Sae hal te mel ssormaer hal  
ddei giedaebbaer piar a gga, meir gga vimil sael a ajjix mex teixl lei a  
ssormaer ddei leil co pixl gger niazzir, <sup>16</sup> nael middur ddei mel ssormaer  
hal ddei leil beijjiu a, yel middur ddei dder zexbbeixr a, lursae te mex  
teixl lei ajjix mel sixr zeil si a. <sup>17</sup> Lursae te dder ssormaer hal ddei leil  
sirzzi zildu a, kebal yar giedae ca mel dax zaxlddaexr ssi. Yar giedae ca  
eil mel hherdder Arbosobo miardal dae mel dax bei mae dae a, Yisu

---

<sup>s</sup>**12:14** *so koxl peix* So koxl peix hherdder liceinir xiubbo, mel dder 1260  
ni.

arseir a ca leil biar gger su ca mel nga a.

<sup>18</sup>Lursae hal te mel neixvi qier leil sa zza ggie ngier dae.

## 13

### *Cinil Nrnel Leil Biar*

<sup>1</sup>Giedae ngo yoxl neixvi gga cinil yarzi gexrddo ar ddei ddeix lei ggie mia a. Cinil eil ddei mel cuxgexdaex cei baex ner dae. Cuxgexdaex cirbaex-hanga leil lei zzirmar ddexrlabox ar ddei ddexr dae. Yar oldde sir taex niar dae. Oldde cirtaex-hanga leil lei mi ar ddei vaexr deix dae. Mi eil mel mel dder Arbosobo leil bbeix no dae arddeir a. <sup>2</sup>Ngo mia cinil eil ddei leil i dae a mel, ssixrmomar ar ddei lesel, yar ddei qihher ddei nael hhe ddei qihher lesel, meir ddei nael hhemar ddei meir lesel. Lursae ddei<sup>t</sup> mel yar ddei bbesur nei yar ddei quexrlixl mel cinil eil ddei<sup>u</sup> leil cirsax gger a; yar leil zzirmar bei lol a. <sup>3</sup>Cinil eil ddei leil i dae a, yar ddei oldde mel gga ar taex a mel ar boxl bei no goxr a, yel zeixleixr nr nga a si a; nael yoxl kor a. Middurbbor ca maelmaerjjia lei yarzi murgur a dder yaa giedae mae dae. <sup>4</sup>Lursae ddei mel yar ddei quexrlixl mel cinil eil ddei leil gger a, yel ca maelmaerjjia lei lursae ddei leil zi. Yaa lei cinil ddei leil zi a bbeix: “Arseir cinil eil ddei dax bir wor xie bbeixleir? Arseir yar leil deil leixl gger xie bbeixleir?”

<sup>5</sup>Cinil eil ddei leil mel quexrlixl gger a, yel yar ddar ha bbeix a mel dder yarzi kuarddo, halae Arbosobo leil bbeix no, yar yoxl 42 xiubbo ddei gga mel arsaе bei niazzir dder arsaе bei cexr. <sup>6</sup>Yar mel meir ddei ngaxl du lei a dder Arbosobo leil bbeix no, halae Arbosobo ddei mi, yar hher ggie nei merlabbor hher dae maelmaerjjia leil bbeix no. <sup>7</sup>Yar leil yoxl

---

<sup>t</sup>13:2 *Lursae ddei* Lursae te mel Sardaxl.

<sup>u</sup>13:2 *cinil eil ddei* Cinil eil ddei mel ca ar ddei a.

quexrlixl gger a, yar Arbosobo ddei cassor-worssor mel leil ddaexr ssi cexr. Yar mel yaa leil ddaexr leixl gger a. Yar lei cirmaex-hanga ca, circuxr-hanga ca, cirgoxr-hanga ca, ciryoxr-hanga ddar te su ca mel leil guaxr cexr. <sup>8</sup> Seixl zil gger goxr Ya hal ddei sul ar ber zza. Sul eil ber leil mel azo lei nr coxl seir dder cirse-cirsil olga zza su ca mel ddei mi guax deix dae. Middurbbor ca maelmaerjjia, ha arseir ddei mi ddei sul hal ber leil guax nr deix dae a mel dder cinil eil ddei leil zi nia.

<sup>9</sup> Nolba niar dae hazza dder noni dae nia.

<sup>10</sup> Arbosobo mel ca arddol mel nael kebal mermi ssu mal nia, ca arddol mel nael altor giedae si nia dixl har dae a; hane ci a mel, arsaebeilei eil mel sael a nga var.

Yel Arbosobo ddei cassor-worssor mel ssertexr zza nia, Arbosobo leil ddarzzi doxr dae nia.

<sup>11</sup> Ngo yoxl middur gga cinil yarzi gexrddo ar ddei<sup>v</sup> ddeix lei ggie mia a. Yar mel ya sael a cuxgexdaex nr baex ner dae, yar ddar te a nael lursae sael a te. <sup>12</sup> Yar xilmeir ddux lei cinil hal ddei sael a quexrlixl zza, yel yar cinil hal ddei leil weix a, middurbbor hher dae ca maelmaerjjia leil bixr a ddoddo-nrddo xilmeir ddux lei cinil hal ddei leil zi lol. Cinil eil ddei mel ar boxl bei no goxr a yel zeixleixr nr nga si a; nael yoxl kor a. <sup>13</sup> Giedae ddux lei cinil hal ddei mel yoxl yarzi sael ddo murgurgurmo bei a, ca mel meixsaer qier leil merlabbor adoxl zei lei lol. <sup>14</sup> Cinil eil ddei yoxl quexrlixl li wo a, yar xilmeir ddux lei cinil hal ddei leil weix a murgurgurmo bei a, middurbbor hher dae ca mel leil fur a xilmeir cinil hal ddei ddei yaxlzi leil zi lol.<sup>w</sup> Yar middurbbor hher dae ca mel leil

---

<sup>v</sup>**13:11** *cinil yarzi gexrddo ar ddei* Cinil nrel ddei lei ca ar ddei a.

<sup>w</sup>**13:14** *xilmeir cinil hal ddei ddei yaxlzi leil zi lol* Cinil ddei yaxlzi ddei

miardal a, altor taexl no gger goxr nael halae gol dae seir cinil hal ddei leil bbex ar ddei bei gger lol. <sup>15</sup> Giedae ddux lei cinil nrmel ddei mel quexrlxl li wo a, bbex hal ddei leil seixl mex dil gger cexr, yel bbex hal ddei leil ddar te var lol. Yar halae bbex hal ddei leil nr zi su ca maelmaerjia leil bei zil gger lol cexr. <sup>16</sup> Cinil eil ddei yoxl casolssor mel leil, cabessor mel leil, zebol mu su mel leil nei armael lozza su vaervaer-yeye cassor-worssor maelmaerjia leil bixr a, ddoddo-nrddo yaa leil hoxltexr ar ddei bei deix gger lol. Ca cirmelmel leil a nael leixrhher yo bbor leil bei deix gger, ca cirmelmel leil a nael ngergazo leil bei deix gger. <sup>17</sup> Hoxltexr eil ddei mel cinil ddei mi nei yar mi ddei hoxlmar ddei nga a. Hoxltexr eil ddei bei nr deix dae ca mel dder vae lei vae nr cexr, vur lei vur nr cexr.

<sup>18</sup> Ca mel olnolddu nia. Olnolddu su ca mel arseir lei hoxltexr eil ddei suax teixl lei xie. Hoxltexr eil ddei mel ca ddei hoxlmar ar ddei a; hherdder 666 ler a.

## 14

### *144,000 Su Ca Mel Merlabbor Caxlgo Yarsixl Caxl*

<sup>1</sup> Ngo yoxl i dae a, Ya ddei mel Xi'a worga hal ga<sup>x</sup> leil ngier dae ggie mia a. Yar dax mel ca 144,000 ngier dax dae. Ca eil mel ddei ngergazo leil mel yar ddei mi nei Yarbbor ddei mi vaexr deix dae. <sup>2</sup> Ngo yoxl merlabbor zeil lei qurte ar ddei bbejjiur a. Qurte eil ddei mel ajjix porpolpor pe zeil lei dae lesel, yoxl almer er dae lesel, halae yoxrcixl

---

arsae bei teixl lei nr saexl, legelbbe, six, bbeixsael kebal hal mel bei teixl lei piar a.

<sup>x14:1</sup> Xi'a worga hal ga Xi'a ae worga hal ga mel dder Yiluxlsaler zzi dax halmaex nga a.

bbaex su mel yoxrcixl bbaex teixl lei dae mel lesel. <sup>3</sup> Ca eil mel mel Arbosobo ddei baxrde taex xilmeir, gol dae hal liller xilmeir halae ca leil guaxr su camar mel xilmeir ngier dae. Yaa caxlgo yarsixl ar ser caxl dae. Caxlgo eil ser mel middurbbor vae xixl lei ca 144,000 ca mel lar caxl var. <sup>4</sup> Capor eil mel mel zeixleixr lei ssormaer dax naer nr goxr. Ya ddei arddolmaex ssi ci mel, yaa dder arddolmaex mae ci. Yaa leil mel cassor-worssor mel gga vae xixl lei a, Arbosobo leil nei Ya ddei leil gger hherdder ca mel loxlmoxr se wo beil hal mel Arbosobo leil gger mel sael a nga.<sup>y</sup> <sup>5</sup> Yaa mel ca leil nr fur, botaddu nr zza.

### *Tisir Soler Ddar Biar*

<sup>6</sup> Ngo yoxl kebal tisir ar ddei a merlabbor bbiu dae mia a. Yar mel middurbbor cirgoxr-hanga ca, circuxr-hanga ca, ciryoxr-hanga ddar te su ca nei cirmaex-hanga ca mel leil cirse-cirsil lei gierbox nixixl nr zza ddar seirseir mel biar gger a. <sup>7</sup> Yar worcixl-worni bbeix: “Arbosobo ca leil serpaxl lei zi ci a; yel Arbosobo leil gexr nia, yar leil bbeix zae gger nia. Merlo-milo, neixvi nei ajjix ddux lei ggie maelmaerjjia leil coxl su Seirpor ddei leil zi nia,” eine bbeix a.

<sup>8</sup> Giedae tisir nnel ddei yoxl bbeix: “De ze! ho a! Babirluixr zzi vaervaer ddei mel de ze! ho a! Babirluixr zzi gga ca mel middurbbor circuxr-hanga ca mel leil puxrto zzipbaer yarzi ix mel dda lol a ca mel leil yaa sael a kerjia lol, hherdder Arbosobo leil nr zi lol,”<sup>z</sup> eine bbeix a.

<sup>9</sup> Giedae tisir soler ddei yoxl worcixl-worni ae dae a bbeix: “Arseir cinil

---

<sup>y</sup>**14:4** *ca mel loxlmoxr se wo beil hal mel Arbosobo leil gger mel sael a nga.* Arbosobo Yirsaexllixl su ca mel leil miardal a eine bei lol. Cu'aezixr Sul23:19 leil i ssi.

<sup>z</sup>**14:8** Ddar eil qier ddei yilsi mel dder yaa Arbosobo leil nr zi. Yaa yarzi puxrto zzipbaer dda nr nga.

ddei leil nei yar ddei yaxlzi ddei leil zi a, ngergazo ddei leil bbeixsael leixrhher ddei leil hoxltexr niar dae a mel, <sup>10</sup> yar lei Arbosobo ddei puxrto zzipbaer ixixmo hal mel dda nia. Ajjix taer dax nr goxr puxrto zzipbaer mel, Arbosobo ddei beizi gga dox ji a, hherdder yar sirzzi dae ca mel leil dda lol nia. Yel ca eil mel leil mel seirceix-seirmaer tisir nei Ya ddei meixsaer qier lei hher dae lol a, adoxl bbiu dae liuxrhuaxr mel sser a gexrddoddomo cu gger. <sup>11</sup> Alker mel cirse-cirsil lei sil deix lei dae a yaa leil goxr sol zildu lol. Cinil ddei leil zi, yar ddei yaxlzi ddei leil zi a, ngergazo leil cinil ddei mi ddei hoxltexr niar dae ca mel merxixl-merni lei zzaso nixixl nr zza a.”

<sup>12</sup> Yel Arbosobo miardal dae mel dax bei mae su ca nei zabbar seirseir a Yisu leil ddarzzi zei si su ca, hherdder Arbosobo ddei cassor-worssor mel ssertexr zza nia.

<sup>13</sup> Ngo yoxl merlabbor zei lei qiurte ar ddei bbejjiur a bbeix: “Ni eil mel vaexr zei lei nia: eilni cirdae a Seirpor leil weix a si ca hal mel Arbosobo leil yaa leil seir lol nia.”

Arbosobo ddei Xiu ddei ddarkoxl a bbeix: “Nga a mar. Yaa seirseir bei dae cirza-hanga mel yaa dax mae dae var,<sup>a</sup> yel yaa zeixleixr lei sulku nr ssa, wornol cexr a.”

### *Arbosobo Middurbbor Ca Mel Leil Faxr*

<sup>14</sup> Ngo yoxl i dae a, zico piulpiumo ar co mia a. Zico eil co leil mel “ca ddei ssor” ddei sael a ar ddei cux dae, yar oldde ddei leil sae bei teixl lei oldde leil ddexrlabox ar ddei ddexr dae, leixrhher gga meixlkor yarzi teix ar baxr vei dae. <sup>15</sup> Yoxl kebal tisir ar ddei a Arbosobo ddei xi gga ddux lei

---

<sup>a</sup>**14:13** *Yaa seirseir bei dae cirza-hanga mel yaa dax mae dae var* Ddar eil qier ddei yilsi mel dder Arbosobo yaa seirseir bei dae hal mel holcir dae yaa leil seir lol.

a, worcixl-worni zico ddei leil cux dae hal ddei leil ae dae a bbeix:  
“Nixixl ddei mel ci ho a, middurbbor loxlmoxr mel lei mo ho a, ni ddei  
meixlkor baxr sser a caer ssi ddo a.”<sup>16</sup> Yel zico ddei leil cux dae hal ddei  
dder meixlkor baxr middurbbor veil ze i a, middurbbor loxlmoxr  
maelmaerjjia lei caer xixl lei a.

<sup>17</sup> Ngo yoxl tisir ar ddei mia a. Yar mel merlabbor Arbosobo ddei xi gga  
ddux lei, yar lei meixlkor yarzi teix ar baxr vei dae.

<sup>18</sup> Giedae tisir ar ddei a Arbosobo leil zi ggie halmaex gga ddux lei a.  
Yar mel halmaex gga adoxl guaxr su a. Yar meixlkor vei dae tisir hal  
ddei leil worcixl-worni ae dae a bbeix: “Middurbbor puxrto mel mi ho a,  
ni ddei meixlkor baxr vei dae a caer ssi ddo a.”<sup>19</sup> Tisir hal ddei dder  
meixlkor baxr middurbbor veil ze i a, puxrto cingaxl-cingaxl maelmaerjjia  
lei caer xixl lei a, yel puxrto zizbaer nixl ggie bbeddur vaervaer ddei  
gga piar ji gger a. Yilsi mel dder Arbosobo sirzzi a ca mel leil faxr.

<sup>20</sup> Puxrto zizbaer nixl ggie bbeddur eil ddei mel zzi ddei maelleil zza dae,  
puxrto cingaxl-cingaxl mel leil mel jjiux a, sirnilni pe teixl lei a,  
middurbbor lei 300 golir vivi mil ci a; neixl ggie bbaer nael mur bbordu  
toxl ggie mumu ddeix ci a.<sup>b</sup>

## 15

### *Ddorbax Sir Peixl*

#### *Bei Leixl Su Caxlgo Caxl*

---

<sup>b</sup>**14:20** Puxrto cingaxl-cingaxl mel ddei yilsi mel dder Arbosobo leil dir  
su ca mel nga a. Arbosobo ddei puxrto zizbaer nixl ggie bbeddur ddei  
yilsi nael dder Arbosobo sirzzi zildu a ca leil ser ggie nga a. Puxrto mel  
leil bbeddur gga piar ji gger a jjiux doxr dae ddei yilsi nael dder yaa leil  
bei zil gger, yel sirnilni ddux lei a. Yirsaexlyal Sul 63:1-6 leil i ssi cexr.



<sup>1</sup> Ngo yoxl merlabbor murgurgurmo yarzi zoxlyoxl ar ddei mia a. Tisir sirlar a mel, goxrsol-goxrnaxr maele zzir hal sir boxl leil guaxr dae. Goxrsol-goxrnaxr eil sir boxl goxr jjia ho a mel, Arbosobo dder sirzzi nor a.

<sup>2</sup> Ngo yoxl bbolixr lesel neixvi ar bbe mia a. Neixvi eil bbe gga mel adoxl lei ca dax dae. Neixvi qier leil mel ca armel ngier dae. Yaa mel cinil yarzi gexrddo hal ddei leil nei yar ddei yaxlzi ddei leil nr zi, cinil ddei hoxlmar hherdder yar ddei mi ddei yaa leil bei deix nr gger lol, yaa cinil hal ddei leil bei leixl gger a. Yaa Arbosobo yaa leil gger yoxrcixl bbaexlabox hal ddei vei dae a, <sup>3</sup> Arbosobo leil miar bei gger su Moxrxi mi ca hal ddei ddei caxlgo ser nei Ya ddei caxlgo ser caxl dae a bbeix:

“Cirza-hanga lei yarzi ddo Seirpor Arbosobo,  
ni bei dae mel mel yarzi murgur, yarzi sexr.

Ni mel circuxr-hanga ddei zzirmar a;

ni bei dae mel mel yarzi bbaehhex, yarzi hoxr.

<sup>4</sup> Seirpor, arseir ni leil nr gexr bbeixleir?

Arseir ni ddei mi ddei leil bbeix zae nr gger bbeixleir?

Ni larnei seirceix-seirmaer.

Ni mel ni bei dae mel bbaehhexhexmo nga ca mel leil saexl lol ho a,  
yel circuxr-hanga ca mel lei ni xilmeir lei a ni leil bbeix zae gger lei  
nia,”

eine caxl dae.

*Tisir Sirlar Nei Maelele Goxrsol-goxrnaxr Sir Boxl Leil Biar*

<sup>5</sup> Eine goxr ho a, ngo yoxl merlabbor Arbosobo ddei xi, hherdder Sexlmuxl<sup>c</sup> ddei ggapu dae mia a. <sup>6</sup> Goxrsol-goxrnaxr sir boxl leil guaxr su

---

<sup>c</sup>15:5 Arbosobo hher ggje xie, hherdder Sexlmuxl Xiboxrlaexr Sul 9:1-3

tisir hal sirler mel Arbosobo ddei xi gga ddux lei a. Yaa mel zzir bei teixl lei pia seibeixbeixmo piulpiumo yarzi naxrcixl ar xiux veixr dae, nixmoxzo ddei leil sae bei teixl lei ar zex neixl gex dae.<sup>7</sup> Gol dae hal liller gga ar ddei a mel, tisir hal sirler leil sae bei teixl lei ddorbax sir peixl gger a. Ddorbax eil mel gga mel Arbosobo ddei puxrto zzibbaer dox ji dae, hherdder Arbosobo sirzzi a ca leil serlabox mel nga a. Arbosobo mel cirse-cirsil lei gol dae.<sup>8</sup> Arbosobo ddei xi gga mel alker sil bbi jjia a. Alker mel yarzi ddo yarzi middux Arbosobo dax ddux lei a. Tisir hal sirler ca mel leil goxrsol-goxrnaxr hal sir boxl goxr nr jjia lol seir hozze mel, arseir lei Arbosobo ddei xi gga ddir nr xie.

## 16

<sup>1</sup> Giedae, ngo Arbosobo ddei xi gga qiurte vaervaermo ar ddei bbejjiur a tisir sirler leil bbeix: “Nia Arbosobo sirzzi a ca leil faxrlabox puxrto zzibbaer dox ji bbi dae ddorbax hal sir peixl middurbbor dox ze i gger ssi,” eine bbeix a.

<sup>2</sup> Xilmeir tisir hal ddei dder ssi a, yar ddei ddorbax peixl middurbbor dox ze i gger a, yel cinil hal ddei ddei hoxltexr niar dae nei yar ddei yaxlzi leil zi goxr ca mel leil dder, ggier yarzi no halae yarzi duxr armel ggier teixl lei a.

<sup>3</sup> Tisir nnel ddei lei yar ddei ddorbax peixl neixvi gga dox ji gger a, yel neixvi mel dder ca sima ddei sirnilni sael a loxr a, neixvi gga olga zza hazza lei si a.

<sup>4</sup> Tisir soler ddei yar ddei ddorbax peixl lazzarmo gga nei lur ddux ggie maelmaerjjia gga dox ji gger a, yel ajjix maelmaerjjia lei sirnilni loxr a.

<sup>5</sup> Ngo bbejjiur a ajjix guaxr su tisir ddei bbeix:

---

leil i ssi cexr.

“Arbosobo ni mel arddol cirsil dder zza dae a;  
eilleix lei zza dae seirceix-seirmaer ddei nga a.  
Ni mel bbaehhexhhexmo ca leil ser su hal ddei nga a.

<sup>6</sup> Halleix yaa mel ni ddei cassor-worssor mel leil  
nei ni ddei xiezi mel leil sirnilni ddux lol goxr a;  
yel ni yaa leil sirnilni dda lol a mel yarzi hoxx.  
Eil ddei mel hherdder yaa li wo mibbe ddei nga a,”

eine bbeix a.

<sup>7</sup> Ngo yoxl Arbosobo leil zi ggie ddei dax qiurte ar ddei me teixl lei ggie  
bbejjiur a bbeix:

“Seirpor, ni mel cirza-hanga lei ddo zzir Arbosobo ddei nga a.  
Ni ca leil ser a mel ngazi mel a ser, halae yarzi bbaehhex.”

<sup>8</sup> Tisir liller ddei yar ddei ddorbax peixl merni taex leil dox deix gger a,  
yel merni taex leil taxl zildu lol, ca mel leil lei taxl no gger xie.

<sup>9</sup> Arbosobo mel goxrsol-goxrnaxr eil mel leil guaxr quexrlixl zza, merni  
taex ca mel leil taxl no gger a, ca mel dder Arbosobo leil bbeix no. Yaa  
mel halae huixr-nr-soxr, yaa cirza-hanga lei ddo zzir Arbosobo ddei leil  
bbeix zae gger nr yuex.

<sup>10</sup> Tisir ngorler ddei yar ddei ddorbax peixl cinil zzirmar ddei baxrde  
taex leil dox ddeix gger a, yel cinil ddei goxr ddei dder neixmarmarmo  
loxr a. Ca mel dder no zildu a armael ddei lo ddei leil kexl. <sup>11</sup> Yaa mel  
ggecir leil ggier ggier a, no zildu a dder merlabbor hher dae Arbosobo  
leil bbeix no, halae yaa bei dae mel huixr-nr-soxr.

<sup>12</sup> Tisir qiuxller ddei yar ddei ddorbax peixl Yofaladir lazzarmo gga dox  
ji gger a, yel lazzarmo vaervaermo eil zex dder hie a, dofa piar a gga lei  
zzirmar mel leil jjiumo ar zex bei har zaxr gger a. <sup>13</sup> Giedae ngo yoxl xiu

nr seir soler mia a. Xiu eil soler mel gelderdo lesel. Yaa lursae ddei meir gga, cinil ddei meir gga nei xiezi yarjiar ddei meir gga ddux lei. <sup>14</sup> Yaa mel neir ddei xiu a, yaa murgurgurmo hal mel bei var. Xiu nr seir eil soler mel, mer woxrke zzirmar maelmaerjjia leil cirgo a ae pex du lei a bei har zaxr dae, yel Arbosobo ddei nixixl yarzi zoxlyoxl hal cir ni ci a, Arbosobo dax zaxlddaexr. Hal cir ni mel cirza-hanga yarzi ddo Arbosobo yar leil vuxryixr su ca mel leil bei leixl gger.

<sup>15</sup> Yisu bbeix: “Nia fadae nia, ngo mel hherdder zzaexpor ker lei mel sael a saexl loci a qie lei, yel hane ci a, zucur dae a pia veixr har dae ca mel Arbosobo yaa leil seir lol a. Yaa mel gorni-gorlael ssi dae nr ssa a; yaa ca mel meixsaer qier leil lei seixlda nr var a.”

<sup>16</sup> Giedae xiu nr seir hal soler dder mer woxrke zzirmar mel leil middei ar maex gga ae pex du lei a. Middei eilmaex leil Xiboxrlaexr ddar mel “Hamirjirdoduixl” bbeix.

<sup>17</sup> Tisir sirler ddei yar ddei ddorbax peixl merlabbor dox dol gger a. Arbosobo ddei xi gga Arbosobo ddei baxrde taex dax dder qiurte vaervaermo ar ddei me teixl lei a bbeix: “Bei jjia ho a.” <sup>18</sup> Yel dder almer bbiexr, almer er, almer zaex nei yarzi gexrddo mi lei a. Middurbbor ca zza ho cirdae a, eilleix zzezze lei zeixleixr lei eil mel sael a larhor mi lei nr goxr. <sup>19</sup> Giedae Babirluixr zzi vaervaer ddei dder so fel loxr a; goxrjia cirddeir-hanga gga zzi mel lei de ze i a. Arbosobo mel Babirluixr zzi vaervaer ddei gga ca mel ddei zuixl mel leil holcir dae, yel Arbosobo dder yaa leil puxrto zzibbaer yarzi ix mel dda lol.<sup>d</sup> Puxrto zzibbaer eil mel mel yar ddei beizi gga dox ji dae a, yar sirzzi dae ca mel leil dda lol labox a. <sup>20</sup> Dal maelmaerjjia lei nr mia a; worga maelmaerjjia lei mier a.

---

<sup>d</sup>**16:19** *Arbosobo dder yaa leil puxrto zzibbaer yarzi ix mel dda lol.* Ddar eil qier ddei yilsi mel dder Arbosobo sirzzi a yaa leil yarzi larhor faxr.

<sup>21</sup> Merlabbor yoxl wortaexlaex yarzi vaer lei ze lei a ca mel ggecir leil de deix dae a. Wortaexlaex eil mel cir taex a dder licei zi sael zza. Wortaexlaex eil mel yarzi sael lei larhor a, ca mel dder Arbosobo leil bbeix no.

## 17

### Ggecir Vurlelsu Ssormaer Mel Dder Babirluixr Zzi Arbosobo Ssormaer Hal Ddei Leil Faxr

<sup>1</sup> Giedae ddorbax sir peixl vei dae tisir hal sirler gga ar ddei a gger lei a ngo leil bbeix: “Ni gger lei a ngo ni leil ggecir vurlelsu ssormaer yarzi middarzza hal te<sup>e</sup> leil faxr dae mel arleixr i lol.<sup>f</sup> Yar mel ajjix mel leil cux deix dae. <sup>2</sup> Middurbbor zzirmar mel yar dax kerjiaer goxr a; mer woxrke ca mel lei yar dax kerjiaer a yar ddei puxrto zzi bbaer mel dda a dda yixr a,” eine bbeix a.

<sup>3</sup> Giedae Arbosobo ddei Xiu ddei mel ngo dax hher ji dae a, tisir ddei ngo leil mipaerbbae gga hier mal gger a. Yel ngo dder ssormaer ar ddei mia a. Ssormaer eil ddei mel cinil nilni ar ddei zzaer dae. Cinil eil ddei mel oldde sir taex niar dae, cuxgexdaex cei baex ner dae. Yar cirgge-circir lei mi vaexr deix dae. Mi eil mel mel Arbosobo leil bbeix

---

<sup>e</sup>17:1 *ggecir vurlelsu ssormaer yarzi middarzza hal te* Ggecir vurlelsu ssormaer eil ddei mel Babirluixr zzi vaervaer hal ddei leil bbeix arddeir a.

<sup>f</sup>17:1 *Ni gger lei a ngo ni leil ggecir vurlelsu ssormaer yarzi middarzza hal te leil faxr dae mel arleixr i lol* Arbosobo Ddei Sul ber leil bbeix, ca mel Arbosobo leil ddar-nr-zzi nei Arbosobo leil nr zi, bbex leil zi ssi a mel, yaa dder bbex mel dax kerjiaer sael a nga, yel yaa mel ggecir vurlelsu mel sael a nga.

vuxryixr dae armel a. <sup>4</sup> Ssormaer eil ddei mel pia nilni nei jjiussi yixrsaexr veixr dae, halae sae, balsixr nei helvirsær yarzi naxrcixl hal mel bbilbbi ddexr dae. Leixrhher gga sae bei teixl lei beizi ar taex vei dae. Beizi gga mel yar si dax kerjiar a yarzi vuxlsuxrddo hal mel ji dae. <sup>5</sup> Yar ngergazo ddei leil yoxl ca mel nr saexl mi ar ddei vaexr deix dae a bbeix:

Babirluixr vaervaer ddei

Ggecir vurlelsu mel ddei yarma,

Middurbbor yarzi vuxryixrddo bei su mel ddei yarma,

eine bbeix a.

<sup>6</sup> Ngo yoxl mia a ssormaer hal ddei mel Arbosobo ddei cassor-worsor mel ddei sirnilni dda. Halae Yisu arseir a ca leil biar gger su ca hal mel ddei sirnilni dda a dda yixr a. <sup>9</sup> Ngo yar leil mia a murgur zildu a. <sup>7</sup> Tisir ddei ngo leil bbeix: “Ni arsaenga a murgur? Ssormaer hal ddei arddolyox yilsi zza nei yar zzaer dae oldde sir taex niar dae halae cuxgexdaex cei baex ner dae cinil eil ddei arddolyox yilsi zza mel, ca mel nr saexl, nael ngo ni leil saexl lol nia. <sup>8</sup> Ni mia dae cinil eil ddei mel halleix nael zza dae, eilleix nael nr zza dae, arddolcar a nael yarzi neixl suddu gga ddux lei nia. Ddux lei ho a nael cirse-cirsil yar leil faxr nia. Middurbbor ca mel ha arseir ddei mi ddei sul hal ber leil guax nr deix dae a mel, yar cinil hal ddei leil mia a mel murgur zildu var. Mi guax deix dae sul eil ber mel azo lei nr coxl seir dder cirse-cirsil olga zza su ca mel ddei mi guax deix dae hal ber nga a.

---

<sup>9</sup>**17:6** *ca hal mel ddei sirnilni dda a dda yixr a* Ssormaer eil ddei “ca hal mel ddei sirnilni dda a dda yixr” eine bbeix a mel, yar Yisu leil ddarzzi su ca cirke seixl zil gger a bbeix arddeir a.

<sup>9</sup>Ca mel olnolddu nia. Oldde hal sir taex mel ssormaer hal ddei cux dae worga sir ga leil bbeix <sup>10</sup>hherdder zzirmar sirler nga a. Nael zzirmar ngorler a mel de zei ho a; cirddeir a nael zza dae seir. Kebal hal ddei nael halae nr lei seir, yar lei a lei cirleixr a hher wo ddo. <sup>11</sup>Halleix nael zza dae, eilleix nael nr zza cinil hal ddei mel zzirmar heixller ddei nga a. Yar lei zzirmar hal sirler gga lei ar ddei a. Yaa dax ciryoxr a nga cirse-cirsil yar leil faxr nia.

<sup>12</sup>Ni cuxgexdaex mia hal cei baex mel hherdder halae zzirmar nr bei lei seir hal ceimo leil bbeix arddeir a. Nael arddolcar a yaa mel quexrlixl li wo a yel cinil ddei dax cirgo a zzirmar arleixr bei cexr. <sup>13</sup>Yaa mel nixmox zzar ciryoxr a xiar ji dae a, yaa ddei bbesur nei quexrlixl mel cinil hal ddei leil gger. <sup>14</sup>Yaa Ya ddei dax zaxlddaexr nia. Nael Ya ddei mel seirpor mel ddei Seirpor, zzirmar mel ddei Zzirmar ddei nga a; yel yar yaa leil ddaexr leixl gger. Yar tiur teixl lei a zabbar seirseir a yar dax mae su mel yar dax cirgo hher dae a.”

<sup>15</sup>Tisir ddei ngo leil bbeix: “Ni mia a ggecir vurlelsu ssormaer hal ddei cux deix dae ajjix mel mel hherdder cirmaex-hanga ca, circuxr-hanga ca, cirgoxr-hanga ca nei ciryoxr-hanga ddar te su ca mel leil bbeix arddeir a. <sup>16-17</sup>Arbosobo mel yar arsae bei niazzir dae mel, zzirmar hal ceimo nixmox zzar ciryoxr a xiar ji dae lol a, yaa dder quexrlixl mel cinil hal ddei leil gger a hherdder Arbosobo bbeix goxr ddar mel sael a nga hane zzeze ci. Yel ni mia dae cuxgexdaex hal cei baex nei cinil hal ddei mel ggecir vurlelsu ssormaer hal ddei leil vuxryixr. Yar ddei cirza-hanga lei su si a, yar leil gorni-gorlael nga lol, yar ddei hoxrneixr zzor halae adoxl sser a yar leil cu pixl gger. <sup>18</sup>Ni mia dae ssormaer hal ddei mel Babirluixr zzi vaervaer eil ddei nga a. Hherdder mer woxrke zzirmar maelmaerjjia leil guaxr su hal ddei nga a.”

*Babirluixr Zzi Ddei Bei Xiaxr Gger*

<sup>1</sup> Eine goxr ho a, ngo yoxl kebal tisir ar ddei a merlabbor zeï lei ggïe mia a. Yar mel yarzi quexrlïxl vaer, yar ddei bbobbolbbo mel middurbbor zoxl gex dae a, middur ddei lei yarzi bbo. <sup>2</sup> Yar worcïxl-worni ae dae a bbeïx:

“De zeï ho a! Babirluixr zzi vaervaer hal ddei de zeï ho a!

Babirluixr zzi vaervaer ddei mel,

neir mel hher ggïe nei cïryoxr-hanga xiu nr seir mel hher ggïe loxr  
a;

halae cïryoxr-hanga yarzi vuxryïxrddo ngax mel ddei cïde loxr a;  
halae cïryoxr-hanga yïrvu-nïlhax hher ggïe loxr a.

<sup>3</sup> Babirluixr zzi vaervaer ddei mel dder

ggecïr vurlelsu ssormaer hal ddei leil bbeïx arddeïr a.

Cïrcïxr-hanga ca mel lei yar ddei puxrto zzïbbaer yarzi ïx mel dda,  
yar dax kerjïar.

Middurbbor zzïrmar mel lei yar dax kerjïar.

Yar mel laxlcïr-laxlzoxl bei a,

mer woxrke vaexleïxr bei su mel lei yar dax zzïrbae cïrke li wo a  
cabessor loxr a.”

<sup>4-5</sup> Ngo yoxl bbeïjiur a merlabbor kebal qïurte ar ddei zeï lei a bbeïx:

“Ngo ddei cassor-worssor mel zzi hal ddei gga hher nr ddo a.

Ssormaer hal ddei zuïxl neïxl zil du a, zuïxl mel merlabbor ddeïx cï  
a;

Arbosobo dder yar yarzi vuxryïxrddo bei dae mel leil holcïr du lei



a.

Yel nialnga ddux lei nia.

Nr nga a yar ddei zuixl mel nia leil ddeix a,  
nia leil dder yar dax ciryoxr a faxr nia.

<sup>6</sup> Yar nia leil arsae bei mel nia yar leil arsae bei koxl xixl nia,  
yar bei dae mel dax zox dae a yar leil hanol bei koxl xixl nia.

Yar nia leil azo zzipbaer dda lol a mel,  
nia gielgiel yar leil bir hal mel leil ix mel dda lol nia.

<sup>7</sup> Yar kuar a bbeix:

‘Ngo mel zzirmar maerssor ddei nga a;  
maermocir nr nga; ngo cixddu cirdoxr lei nr zza.’

Yel yar arsae laxlcir-laxlzoxl bei a armael leil middarzza lol a mel,  
nia dder yar leil hal mel sael a zzasol lol, halae goxrsol-goxrnaxr  
goxr lol nia.

<sup>8</sup> Yel yar leil ser lei cir ni dder,  
yar ddei zzi ddei gga ca lei cirke si lol, zzorddu nr zza lol, cix lol,  
goxrsol-goxrnaxr eil mel goxr lol.

Yar leil serpaxl su Seirpor Arbosobo ddei mel yarzi ddo,  
yel yar leil adoxl gga cu nia.”

<sup>9</sup> Yar dax kerjiar goxr yar sael a laxlcir-laxlzoxl bei su zzirmar mel, yar  
leil adoxl cu dae a, alker sil teixl lei dae ggie mia a dder yar leil aenge  
gger. <sup>10</sup> Arbosobo yar leil zzasol zildu lol a, zzirmar hal mel dder gexr a  
yar leil i nr bel a, vimirmir sael ngier dae a ae dae a bbeix:

“War a! Babirluixr zzi yarzi vaer, yarzi ssei eil ddei zoxr a!  
Arbosobo cirleixr dder ni leil ser lei a.”

<sup>11</sup> Arseir lei yar ddei zzaegu vae su nr zza a, middurbbor vaexleixr bei

su mel lei yar leil nge gger. <sup>12</sup> Arseir lei yar ddei piu, sae, balsixr, helvirsaer yarzi naxrcixl hal mel vae su nr zza a. Arseir lei yar ddei zzir bei teixl lei mae, jjiussi yixrsaexr mae, vibox nei mae nilni yarzi naxrcixl eil mel vae su nr zza a. Yarzi ner xiu sixlox nei ho zzae bei teixl lei zzaegu, halae six yarzi naxrcixl, zzir, he nei daxllirsixr eil mel sser a bei teixl lei ciryoxr-hanga zzaegu mel vae su nr zza a. <sup>13</sup> Arseir lei yar ddei guixlpixr, xiuzixzix hal mel, yarzi ner xiu hexzzi, moxlyoxl, ssurxia,<sup>h</sup> halae puxrto zzipbaer, saercor ssuvi, some, so, niur, ya, mur, marcae, halae zebol lei vae su nr zza a. <sup>14</sup> Vaexleixr bei su eil mel yar leil bbeix: “Ni nixmox zzar li niazzir dae mel lei nr mia a. Yarzi zae zzaegu mel nei yarzi naxrcixl zzaegu mel lei mier a; zeixleixr lei zo wo nr ddo a.” <sup>15</sup> Yar leil zzaegu eil mel vur gger a bei be su ca mel, Arbosobo yar leil zzasol lol ggie mia a dder a gexr a. Yel yaa vimirmir sael ngier dae a yar leil aenge gger a bbeix:

<sup>16</sup> “Yir! Zzi vaervaer eil ddei nael zoxr a naer!

Zzi gga ca mel zzir pia naxrcixlcixl veixr dae, jjiussi yixrsaexr pia nei pia nilni veixr dae,

halae piu sae, balsixr, helvirsaer yarzi naxrcixl mel ddexr dae.

<sup>17</sup> Nael yar ddei cirza-hanga yarzi naxrcixl mel cirleixr dder mier a.”

Cuaxr seirpor mel, cuaxr cux su mel, cuaxr gga miar bei su mel nei neixvi leil koxl dae a nixixl goxr su maelmaerjjia lei vimirmir sael ngier dae. <sup>18</sup> Yaa mel zzi eil ddei leil adoxl cu a yel alker sil teixl lei dae ggie

---

<sup>h</sup>**18:13** *moxlyoxl, ssurxia* Ssurxia nei moxlyoxl mel six zzei ddei taxrvixr ka bei teixl lei. Ssurxia mel hexzzi sael a doxllabox lei bei cexr, yarzi ner xiu. Moxlyoxl mel ggecir leil meilabox naxcir bei cexr, ggecir ddei leil nerxiu lol, ca sima ggecir leil lei mei gex cexr, ggecir ddei xiaxr nr var.

mia a dder ae dae a bbeix: “Zzi arddol ddei zzi vaervaer eil ddei zzi zza bbeixleir!”<sup>19</sup> Yaa yoxl armael oldde ddei leil nilme xiu deix gger a, cix a aenge dae a bbeix:

“Yir! Zzi vaervaer eil ddei nael zoxr a naer!

Cuaxr seirpor maelmaerjjia yar leil koxl dae a cabessor loxr a;  
nael yar ddei cirza-hanga mel cirleixr dder mier a!

<sup>20</sup> Arbosobo mel bbaehhexhhex a

yar leil ser a,

yar nia leil bei dae mel sael a yar leil bei koxl xixl ho a;

yel merlabbor hher dae mel,

Arbosobo ddei cassor-worssor mel,

Yisu miardal dae ca mel,

halae xiezi mel,

nia ggese nia.”

<sup>21</sup> Giedae ngo yoxl tisir yarzi warni ar ddei mia a. Yar mel legelbbe yarzi vaer nger sael a ar taex bil du lei a, neixvi gga piar ji gger a bbeix:

“Babirluixr zzi ddei leil lei eil mel sael a

bbebbelbbe neixvi gga piar ji gger nia, yel zeixleixr lei mia nr ddo  
a.

<sup>22</sup> Babirluixr zzi gga zeixleixr lei yoxrcixl bbaex su mel leil yoxrcixl

bbaex ggie bbejjiur nr ddo a;

caxlgo caxl ggie, mexlur mex ggie, nei baerlae mex ggie lei bbejjiur  
nr ddo a.

Cirza-hanga zzaegu bei a yarzi bei seir ca mel leil lei zo wo nr ddo a;

zeixleixr nger gga ggie lei bbejjiur nr ddo a.

<sup>23</sup> De mel lei zeixleixr lei bbo nr var a.

Zeixleixr lei cirmusixl nei mixlyixrsixl ddar biar ggie bbejjiur nr ddo  
a.

Zzi eil ddei gga vaexleixr bei su ca mel, halleix middurbbor ca mel  
arseir lei yaa leil i du.

Zzi eil ddei gga ca mel neir bei a, middurbbor circuxr-hanga ca mel  
leil lei fur a.

<sup>24</sup> Xiezi mel ddei sirnilni nei Arbosobo ddei cassor-worssor mel ddei  
sirnilni lei Babirluixr zzi ddei gga zza dae.

Seixl zil gger goxr ca maelmaerjgia ddei sirnilni mel lei zzi eil ddei gga  
zza dae.

Yel dder Babirluixr zzi ddei leil faxr arddeir a.”

## 19

### *Merlabbor Hher Su Mel Arbosobo Leil Bbeix Zae Gger*

<sup>1</sup> Eine goxr ho a ngo yoxl qiurte vaervaermo ar ddei bbejjiur a. Ca  
seirseil ake a merlabbor ae dae sael a nga, yaa bbeix:

“Halixlluxlyar!<sup>i</sup>

Niul ddei Arbosobo mel dder ca leil jiuxlsu ddei nga a.

Yar mel yarzi middux, yarzi ddo.

<sup>2</sup> Ggecir vurlelsu yarzi middarzza ssormaer hal te mel ca dax kerjjar  
a,

middurbbor ca mel leil yarzi vuxryixrddo bei lol,

yel Arbosobo dder yar leil faxr.

Yar halae Arbosobo leil miar bei gger su mel leil seixl zil gger a,

---

<sup>i</sup>**19:1** *Halixlluxlyar* “Halixlluxlyar” ddei yilsi mel dder Arbosobo leil  
bbeix zae gger nia bbeix arddeir a.

Arbosobo dder yar leil bei koxl xixl.  
Arbosobo eine ser a mel yarzi hoxr yarzi bbaehhex.”

<sup>3</sup> Yaa yoxl ae dae bbeix:

“Halixlluxlyar!  
Ssormaer hal te leil hherdder zzi vaervaer hal ddei leil mel adoxl cu  
dae a,  
yel alker mel cirse-cirsil lei sil nor nr var.”

<sup>4</sup> Ca leil guaxr su camar hal nrzei liller nei gol dae hal liller dder niul  
ddei Arbosobo ddei baxrde taex xilmeir puxr gex dae a yar leil bbeix zae  
gger a bbeix:

“Amae, Halixlluxlyar!”

*Ya Ddei Leil Ggie Baxl Gger*

<sup>5</sup> Giedae yoxl baxrde taex dax qiurte ar ddei me teixl lei a bbeix:

“Arbosobo leil miar bei gger su nei yar leil gexr su ca mel,  
quexrlixl zza bbeixsael quexrlixl nr zza lei maelmaerjjia lei  
Arbosobo leil bbeix zae gger nia.”

<sup>6</sup> Yoxl qiurte ar ddei bbejjiur a, ca seirseil ar ke a ae dae nei ajjix  
porpolpor pe zeil lei dae sael a nga, halae almer er dae sael a nga, yel  
bbeix:

“Halixlluxlyar!  
Niul ddei Seirpor Arbosobo cirza-hanga yarzi ddo.  
Yar cirmaex-hanga guaxr dae,

<sup>7</sup> Ya ddei mel ggie baxl zi ci a,  
yar ddei cirmusixl ddei cirza-hanga lei bei har zaxr ho a.  
Yel niul ggegge-sese a bei a  
Arbosobo leil middux lol nia.

<sup>8</sup> Yar cirmusixl ddei leil zzir bei teixl lei pia piu taexltaexlmo  
seibeixbeixmo ar xiux gger a.”

Pia naxrcixl eil xiux mel hherdder Arbosobo ddei cassor-worssor mel  
seirseir bei dae hal mel leil bbeix arddeir a.

<sup>9</sup> Yel tisir ddei ngo leil bbeix: “Ni eil mel vaexr zeil lei nia: Ya ddei ggie  
baxl a seivi qie, yel seivi mu lei su ca hal mel leil Arbosobo yaa leil seir  
lol a.” Tisir ddei yoxl ngo leil bbeix: “Eil mel mel Arbosobo ddei ddarzi  
mel nga a.”

<sup>10</sup> Yel ngo dder yar xilmeir puxr gex dae a yar leil bbeix zae gger niazzir  
dae a; nael yar ngo leil bbeix: “Ni eine bei nr ddo. Yisu mel yar ddei  
ddarzi mel hoba xiezi mel leil saexl lol a, yaa leil ca mel leil biar gger ssi  
lol. Ngo nei ni halae Yisu arseir a ca leil biar gger su arzzi-nimar  
arzzi-nimo mel lei Arbosobo leil miar bei gger su lar nga. Yel ni  
Arbosobo leil bbeix zae gger nia.”

### **Mur Piulpiu Zzaer Su Ddei Mel Yisu A**

<sup>11</sup> Giedae merlabbor ddei ggapu a, ngo mur piulpiu ar ddei mia a. Mur  
zzaer su ddei leil mel “Yarzi Ddarzziddo” mi halae “Ddarzi” mi. Yar mel  
bbaehhexhhex a ca leil ser nei zaxlddaexr. <sup>12</sup> Yar ddei meixddur ddei mel  
adoxlle sael a nga. Yar oldde leil zzirmar ddexrlabox cirke dder dae. Yar  
leil mi ar ddei vaexr deix dae. Nael mi eil ddei mel yar lar saexl.

<sup>13</sup> Arbosobo ddei Ddar mel dder yar ddei mi ddei nga a. Yar sirnilni niuxl  
goxr pia darsisi ar xiux veixr dae. <sup>14</sup> Merlabbor meixr mel zzir bei teixl lei  
pia piu taexltaexlmo seibeixbeixmo ar xiux veixr dae. Yaa mur piulpiu

zzaer dae a yar dax mae dae. <sup>15</sup> Yar meir gga altor yarzi tei ar baex pir teixl lei a. Yar altor eil baex sser a circuxr-hanga leil deil leixl gger a. Halae “he zzargger sser a yaa leil guaxr.”<sup>j</sup> Yoxl yar leil dir su mel leil faxr nia, hherdder ca mel puxrto zzubbaer nixl ggje bbeddur gga puxrto jjiux sael a nga. Yar eine bei a mel ca mel leil saexl lol, cirza-hanga lei ddo zzir Arbosobo ddei sirzzi zildu a. <sup>16</sup> Yar ddei pia darsisi xiux leil nei pirzei leil mel

zzirmar mel ddei Zzirmar,  
seirpor mel ddei Seirpor

mi eine ar ddei vaexr deix dae.

## **Arbosobo Yar Leil Vuxryixr Su Mel Leil Deil Leixl Gger Yaa Leil Serpaxl Jjia**

*Yisu Cinil Yarzi Gexrddo Nei Yar Dax Mae Dae Su Mel Leil Bei Leixl Gger*

<sup>17</sup> Ngo yoxl tisir ar ddei mia a. Yar mel merni taex gga ngier ji dae, yar worcixl-worni merlabbor bbiu dae ngax maelmaerjjia leil ae dae a bbeix: “Lei, nia Arbosobo dax horhor-zzizzi daxlgaxl-daxllixl zzor lei. <sup>18</sup> Nia zzirmar mel ddei hor, meixr guaxr su vaervaerpor mel ddei hor nei meixr mel ddei hor zzor lei, halae mur hor nei mur zzaer su mel ddei hor zzor lei, yoxl zebol mu su ca mel ddei hor, armael lozza su ca mel ddei hor, quexrlixl zza nei quexrlixl nr zza ciryoxr-hanga ca mel ddei hor zzor lei.”

<sup>19</sup> Ngo yoxl mia a, cinil te nei middurbbor zzirmar mel yaa ddei meixr mel leil cirgo a ae pex dae a, mur piulpiu zzaer su hal ddei dax nei yar ddei meixr mel dax zaxlddaexr ssi. <sup>20</sup> Nael cinil te leil mel ssu gex du lei a;

---

<sup>j</sup>**19:15** “he zzargger sser a yaa leil guaxr” Ddar eil qier Sipi Sul 2:9 leil vaexr dae.

yar leil weix a murgurgurmo bei goxr xiezi yarjiar te leil lei ssu gex du lei a. Xiezi yarjiar te mel murgurgurmo bei a, cinil te ddei hoxltexr niar dae ca mel leil nei cinil te ddei yaxlzi leil zi su ca mel leil fur. Yel yaa nr te leil mel gol dae seir dder adoxl bbiu dae bbeddur ddei gga piar ji gger a. Bbeddur eil ddei gga mel liuxrhuaxr cu dae. <sup>21</sup> Yaa ddei meixr mel leil nael mur zzaer su hal ddei meir gga pir teixl lei altor baex bei zil gger a. Yel ngax maelmaerjia lei yaa ddei hor mel zzor lei a, zzor box zildu a.

## 20

### *Neir Zzirmar Te Leil Ge Du Lei A*

<sup>1</sup> Giedae ngo yoxl tisir ar ddei a merlabbor zei lei ggje mia a. Yar mel suddu yarzi neixl hal ddei ddei zzuxci vei dae nei hexsox vaervaermo ar zex vei dae. <sup>2</sup> Yar mel lursae te leil ssu gex du lei a. Lursae eil te mel halcar tortor dder zza dae sae te nga a; yar mel neir zzirmar te nga a; yar leil Sardaxl ae. Tisir ddei yar leil cirdu koxl neixl gex. <sup>3</sup> Halae yar leil suddu yarzi neixl hal ddei gga piar ji gger a, ggabil du lei a; yoxl ddux lei nr cexr za niaxl gex gger a; yel cirdu koxl nr ci hozze mel yar leil circuxr-hanga ca mel leil nr fur ssi lol. Nael cirdu koxl goxr ho a, yar leil yoxl arleixr piur teixl lei.

### *Yisu Leil Ddarzzi Su Mel Gol Du Xixl Lei A Yisu Dax Cirgo A Zzirmar Cirdu Koxl Bei*

<sup>4</sup> Ngo yoxl zzirmar baxrde armel mia a, baxrde leil cux su hal mel ca leil serpaxl quexrlxl zza. Ngo yoxl Yisu arseir a ca leil biar gger nei Arbosobo ddei ddar mel ca leil biar gger a, si yaa leil oldde taexl teixl gger ca hal mel leil mia a. Yaa mel cinil hal te leil nei yar ddei yaxlzi te leil zi nr goxr, ngergazo leil bbeixsael leixrhher leil lei yar ddei hoxltexr nr niar dae. Yel yaa gol du xixl lei a, Zidu dax cirgo a zzirmar cirdu koxl



bei. <sup>5</sup> Eilboxl gol du xixl lei su ca mel mel gol du xixl lei beil mel nga a. Kebal si ho ca hal mel nael cirdu koxl goxr ho a saelnei gol du xixl lei.

<sup>6</sup> Gol du xixl lei beil ca hal mel mel seirceix-seirmaer mel nga a; yaa miexr seir a. Yaa zeixleixr ar boxl si nr var, yilsi mel dder Arbosobo yaa leil nr faxr. <sup>k</sup> Yaa mel Arbosobo leil zi su nei Zidu leil zi su bei nia, yaa Zidu dax cirgo a zzirmar cirdu koxl bei nia.

### *Neir Zzirmar Sardaxl Te Leil Deil Leixl Gger*

<sup>7</sup> Cirdu koxl goxr ho a, Sardaxl te leil mel yar leil ge ggie halmaex piur teixl lei var. <sup>8</sup> Yar mel middurbbor goxrjia maelmaerjjia leil fur ssi, hherdder Gegexr nei Margel<sup>l</sup> nga a. Sardaxl te mel yaa leil ae pex du lei a zaxlddaexr ssi. Yaa ca mel mel neixvi qier leil sa mel sael a miur. <sup>9</sup> Yaa mel middurbbor zzarvul-zzarmae lei a, yel Arbosobo perniar dae cassor-worssor mel hher ggie zzi ddei leil weixr gex du lei a. Nael merlabbor adoxl zei lei a yaa leil cu pixl gger a. <sup>10</sup> Yaa leil fur su neir zzirmar te leil nael liuxrhuaxr cu dae adoxl bbeddur gga piar ji gger a; cinil te nei xiezi yarjiar te mel halmaex hher dae ho a. Arbosobo mel yaa leil goxr sol lol a, yel yaa merxixl-merni lei cirleixr lei nr nor zzasol zildu a.

### *Arbosobo Ca Mel Leil Serpaxl*

<sup>11</sup> Giedae ngo yoxl zzirmar baxrde piulpiumo yarzi vaer ar taex mia nei baxrde taex leil cux dae hal ddei leil mia a. Merlabbor nei middurbbor ddei lei yar leil pa a, zeixleixr lei nr mia a. <sup>12-13</sup> Ngo yoxl mia a, neixvi gga

---

<sup>k</sup>**20:6** *Yaa zeixleixr ar boxl si nr var, yilsi mel dder Arbosobo yaa leil nr faxr* Ddar eil qier ddei yilsi mel dder Arbosobo yaa leil adoxl bbeddur gga piar ji nr gger.

<sup>l</sup>**20:8** *Gegexr nei Margel* Yirsijiexr Sul 38 leil bbeix Margel nael mermi ddei mi, Gegexr nael Margel mermi vaervaerpor ddei mi.

si zil dae ca mel, Yijie gga hher su ca mel, quexrlixl zza bbeixsael quexrlixl nr zza lei baxrde taex xilmeir ngier dae. Yel ca mel middurbbor nixixl goxr dae car a arsae lerler nga goxr guax deix dae sul hal mel ddaexr kae a. Cirse-cirsil olga zza su ca mel ddei mi guax deix dae sul hal ber lei ddaexr kae a. Yel ca si ho mel leil serpaxl car a mel, sul hal mel leil guax deix dae mel dax zox dae a, yaa arsae bei goxr mel dder arsae serpaxl. <sup>14-15</sup> Yisu leil ddar-nr-zzi si ho ca mel leil nei Yijie gga hher dae mel leil adoxl bbeddur gga piar ji gger. Ha arseir ddei mi ddei olga zza su ca mel ddei mi guax deix dae sul hal ber leil guax nr deix a mel, arseir leil dder adoxl bbeddur gga piar ji gger. Eine nga a mel dder nr boxl ddei si a.

## 21

### Cirza-Hanga Yarsixl Loxr A

#### Mersixl-misixl

<sup>1</sup> Giedae ngo yoxl mersixl-misixl ar ddei mia a. Halleix ddei merlabbor nei middurbbor mel leil nr mia a; neixvi mel lei mier a. <sup>2</sup> Ngo yoxl Arbosobo ddei zzi Yiluxlsaler yarsixl ddei leil mia a. Zzi eil ddei mel merlabbor Arbosobo dax halmaex zeil lei. Yar mel cirmusixl sael a nga, cirza-hanga lei bei har zaxr ho a, yar capor ddei leil xia dae a. <sup>3</sup> Ngo yoxl Arbosobo ddei baxrde taex dax qiurte vaervaermo ar ddei me teixl lei ggje bbejjiur a bbeix: “Eilcar Arbosobo ca mel dax cirgo a hher dae. Yar mel ca mel dax cirgo a hher nia. Ca mel yar ddei cassor-worssor bei nia. Arbosobo malmal yaa dax hher dax dae a, yaa ddei Arbosobo bei nia. <sup>4</sup> Arbosobo yaa ddei meixbbix cirtaex-hanga six xia gger nia. Halleix ddei cirza-hanga mel goxr jixr ho a; yel ca mel lei zeixleixr lei si nr var a; cixddu lei nr zza a; nge ddu lei nr zza a; noco lei nr zza a.”

<sup>5</sup> Baxrde taex leil cux su hal ddei bbeix: “I ddo a. Ngo cirza-hanga lei yarsixl lael box a!” Yar yoxl bbeix: “Ddar eil mel yarzi a; halae ddarzziddo, yel ni eil mel vaexr zeil lei nia.” <sup>6</sup> Yar yoxl ngo leil bbeix: “Bei jjia ho a. Ngo mel A'exrfar a, (ollele ddei a); ngo mel Exrmeixrgexr a, (maelele ddei a). Lur gga ddux lei cirse-cirsil olga zza lol var ajjix mel, ngo ajjix sixl su ca mel leil meixl da nia.” <sup>7</sup> Bei leixl su ca ddei mel dder eil mel li wo ddo. Ngo mel yar ddei Arbosobo bei nia, yar mel ngo ddei anix bei nia. <sup>8</sup> Nael nixmox ye su ca, Arbosobo leil ddar-nr-zzi su ca, yarzi vuxryixrddo bei su ca, caseixlsu ca, kerjiax su ca, neir bei su ca, bbex leil zi su ca nei ddar jiar te su ca mel dder eine nga var: yaa leil mel liuxrhuaxr cu dae adoxl bbeddur gga piar jji gger. Adoxl bbeddur gga piar ji gger a mel dder nr boxl ddei si a.”

### Yiluxlsaler Yarsixl

<sup>9</sup> Ddorbox sir peixl vei dae a goxrsol-goxrnaxr maele zzir hal sir boxl leil guaxr dae tisir sirlar gga ar ddei a ngo leil bbeix: “Ni gger lei a ngo ni leil cirmusixl ddei leil i lol. Yar mel dder Ya ddei maerssor ddei nga a.” <sup>10</sup> Yel Arbosobo ddei Xiu ddei ngo dax hher dax dae a, tisir ddei ngo leil worgamo darmumu ar ga leil hier la a. Ngo dder merlabbor Arbosobo dax halmaex zeil lei Arbosobo ddei zzi ddei leil mia a; hherdder Yiluxlsaler ddei nga a. <sup>11</sup> Arbosobo ddei bbobolbbo mel zoxl zeil lei a zzi ddei leil zoxl gex dae a, yel yol nibaexbaex leisel, balsixr sseirsseilsseir hal mel sael a bbo, halae suilji mel sael a i bei ddo. <sup>12</sup> Zzi ddei leil mel weixrqiaxr yarzi mu yarzi vaer weixr gex dae, weixrqiaxr leil mel gielmi ceinir peixl zza, yel tisir ceinirmo su dae. Gielmi mel leil Yirsaexllixl su ca ceinir cuxr ddei mi vaexr deix dae. <sup>13</sup> Cirpiar-hanga lei gielmi so peixl zza, dofa piar a gga so peixl, xifa piar a gga so peixl, naxrfa piar a gga so peixl, baexrfa piar a gga so peixl. <sup>14</sup> Weixrqiaxr ddei sixrjiuxr mel legelbbe vaervaermo ceinir taex sser a xiax du lei. Legelbbe ceinir taex

leil mel Ya ddei miardal dae ca hal ceinirmo ddei mi vaexr deix dae.

<sup>15</sup> Ngo dax ddar biar su tisir ddei mel sae bei teixl lei zzargger liaxrlabox ar caex vei dae a, zzi ddei leil nei zzi gielmi mel leil halae weixrqiaxr ddei leil liaxr niazzir dae. <sup>16</sup> Zzi hal ddei mel sixlfa ar ddei a.

Tisir hal ddei liaxrlabox caex vei dae a, zzi hal ddei leil liaxr a, cirpiar-hanga 2400 golir liaxr wo a. Siggiebbaer, kuaxggiebbaer nei muggiebbaer lei ciryoxr a nga. <sup>17</sup> Tisir hal ddei ca mel zzaegu liaxrlabox mel dax zox dae a liaxr a, weixrqiaxr ddei tuggiebbaer mel 60 gocixr liaxr wo a. <sup>18</sup> Weixrqiaxr ddei mel yol nibaexbaex sser a bei teixl lei. Zzi ddei nael sae lillil a sser a bei teixl lei, halae bbolixr sael a i bei ddo.

<sup>19</sup> Weixrqiaxr ddei sixrjiuxr mel leil nael ciryoxr-hanga balsixr sser a zaelzae arla bei deix dae: legelbbe xilmeir hal taex leil nael yol lesel sser, nr taex ddei leil nael sseirsseilsseir balsixr laxllaxr sser, so taex ddei leil nael bbo var yol lesel sser, li taex ddei leil nael sseirsseilsseir bbo var balsixr nibaexbaex sser, <sup>20</sup> ngor taex ddei leil nael bbo var legelbbe lesel nilni sser, qiuxl taex ddei leil nael bbo var yol nilni sser, sir taex ddei leil nael i bei ddo bbo var yol lesel nibaexbaex sser, heixl taex ddei leil nael i bei ddo balsixr sser, ge taex ddei leil nael bbo var balsixr sser, cei taex ddei leil nael yol nibaexbaex lesel sser, ceidil taex ddei leil nael balsixr nilni sser, ceinir taex ddei leil nael jjiussi yixrsaexr yol lesel sser.

<sup>21</sup> Gielmi ceinir peixl mel hherdder helvirsaeer yarzi naxrcixl yarzi vaer ceinir taex bei teixl lei. Cirpeixl-hanga lei helvirsaeer yarzi naxrcixl ar taex sser a bei teixl lei. Zzi hal ddei gga zzijiul vaervaer zex nael sae lillil a sser a bei teixl lei, yel bbolixr sael a i bei ddo.

<sup>22</sup> Cirza-hanga lei ddo zzir Seirpor Arbosobo ddei nei Ya ddei mel dder zzi eil ddei gga Arbosobo leil zi ggie xi zzir nga a. Yel ngo zzi eil ddei gga ca mel zi teixl lei Arbosobo leil zi ggie xi zzir leil nr mia. <sup>23</sup> Arbosobo ddei bbobbolbbo mel zzi eil ddei leil zol gex dae, Ya ddei mel hherdder zzi eil

ddei ddei de ddei nga a; yel zzi eil ddei mel merni nei xiubbo bbele lol nr ssa.<sup>24</sup> Arbosobo ddei bbobbolbbo mel mer woxrke circuxr-hanga ca mel leil bbele lol a. Middurbbor zzirmar mel yaa ddei cirza-hanga naxrcixlcixl mel zzi eil ddei gga ba mal gger lei a.<sup>25</sup> Zzi eil ddei gga mel neixmar nixixl nr zza, yel zzi gga gielmi mel arddolcar lei ggapu dae.<sup>26</sup> Middurbbor circuxr-hanga ca mel, yaa ddei cirza-hanga naxrcixlcixl mel nei sseirsseilsseir bbo var hal mel zzi eil ddei gga ba mal gger lei a.<sup>27</sup> Nael nixmox zzar sei-nr-beix hal mel nei yarzi vuxryixrddo bei su hal mel halae ca leil fur su hal mel zzi eil ddei gga ddir wo nr ddo; Ya ddei sul ber leil mi guax deix dae ca hal mel lar ddir wo ddo, ca eil mel mel cirse-cirsil lei olga zza hal mel nga a.

## 22

<sup>1</sup> Tisir ddei yoxl ngo leil ca leil cirse-cirsil olga zza lol var lazzarmo ar zex mia lol a. Lazzarmo eil zex mel sseirsseilsseir suilji sael a i bei ddo, hherdder Arbosobo ddei baxrde taex dax nei Ya ddei baxrde taex dax halmaex pe teixl lei a,<sup>2</sup> zzi hal ddei gga, zzijiul agala gga pe gel dae. Lazzarmo nrbbor nrbbu leil mel ca leil olga zza lol var saer zzei dae dae.<sup>m</sup> Saer eil mel mel cir koxl ceinir boxl niar, cir xiubbo leil ar boxl niar. Saer peixl mel nael circuxr-hanga ca mel ddei no ggu cexr.<sup>3</sup> Arbosobo mel zzi eil ddei gga ciryoxr-hanga leil lei seir lol a; ciryoxr leil lei nr faxr. Arbosobo ddei baxrde taex nei Ya ddei baxrde taex mel zzi eil ddei gga zza dae, yel yar leil miar bei gger su mel yar leil visser.<sup>4</sup> Yaa mel Arbosobo leil malma mia ddo. Yaa ddei ngergazo leil lei yar ddei mi vaexr deix dae.<sup>5</sup> Zzi eil ddei mel neixmar nixixl nr zza. Seirpor Arbosobo ddei bbobbolbbo mel yaa leil zoxl gex dae, yel merni ddux nr ssa, de doxl nr ssa. Yaa mel cirse-cirsil lei zzirmar bei nia.

---

<sup>m</sup>22:2 Cuaxlsixljil Sul 2:9 nei 3:22-24 leil biar dae.

## Yisu Jjixr Lei Du A

<sup>6</sup> Tisir ddei yoxl ngo leil bbeix: “Ddar eil mel mel ngazi a; halae yarzi ddarzziddo. Seirpor Arbosobo ddei mel yar ddei Xiu ddei xiezi leil gger a. Yel yar, yar ddei tisir leil miardal a yar leil miar bei gger su mel leil cirleixr dder nga du eil mel saexl lol.”

<sup>7</sup> Yisu bbeix: “I dae la ddo a. Ngo cirleixr dder jjixr lei du a! Yel sul eil ber leil vaexr har zaxr dae mel dax bei mae dae su mel Arbosobo yaa leil seir lol nia,” eine bbeix a.

<sup>8</sup> Ngo mel Yuehal a. Ngo eil mel leil mia nei bbejjiur a dder ngo leil eil mel saexl lol su tisir ddei xilmeir puxr gex dae a yar leil zi niazzir dae a.

<sup>9</sup> Nael yar ngo leil bbeix: “Ni eine bei nr ddo. Ngo nei ni halae ni ddei arzzi-nimar xiezi mel nei sul eil ber leil vaexr dae mel dax bei mae dae su ca mel lei ciryoxr a nga. Niul maelmaerjjia lei Arbosobo leil miar bei gger su lar nga. Yel ni Arbosobo leil zi nia.”

<sup>10</sup> Tisir ddei yoxl ngo leil bbeix: “Ni leil mia lol eil mel maelmaerjjia cirleixr dder bei du a; yel ni sul eil ber leil vaexr har zaxr goxr eil mel ca leil i lol nia. <sup>11</sup> Nr seir bei su mel leil nr seir bei doxr dae lol ddo a; yarzi vuxryixrddo bei su mel leil yarzi vuxryixrddo mel bei doxr dae lol ddo a; seirseir bei su mel leil lei seirseir bei doxr dae lol ddo a; seirceix-seirmaer su mel leil seirceix-seirmaer doxr dae lol ddo a.”

<sup>12</sup> Yisu bbeix: “I dae la ddo a. Ngo cirleixr dder jjixr lei a! Ngo leil ddarzzi su mel leil nael seirseir mel gger jjixr lei, ddar-nr-zzi su ca mel leil nael faxr jjixr lei. Ca mel arsae bei goxr a mel, ngo dder yaa leil arsae bei koxl xixl. <sup>13</sup> Ngo mel A'exrfar a; ollele ddei a; ngo mel Exrmeixrgexr a; maelele ddei a; bei beil su ddei lei ngo nga a; bei jjia su ddei lei ngo nga a.

<sup>14</sup> Armael ddei pia darsisi xiux seibeixbeix a cir su ca mel Arbosobo yaa leil seir lol nia. Yaa mel cirse-cirsil ca leil olga zza lol var saer hal zzei

zzor quexrlixl zza, halae gielmi gga ddir a zzi ddei gga ddir wo ddo.

<sup>15</sup> Nael neir bei su, kerjjar su, caseixlsu, bbex leil zi su, ddarjjar te su nei ca leil fur su, hherdder anol sael a sei-nr-beix ca eil mel mel zzi ddei gga ddir wo nr ddo.

<sup>16</sup> Ngo mel Yisu a. Ngo, ngo ddei tisir leil miardal a, jiaxluixl cirddeir-hanga leil eil mel biar gger ssi lol. Ngo mel Daxlweixl giedae ca a;<sup>n</sup> ngo mel hherdder merteir a ddux lei bbelelemo teirgie hal taex nga a.”

<sup>17</sup> Arbosobo ddei Xiu ddei nei cirmusixl ddei bbeix: “Lei ddo a.” Bbejjiur su ca hazza lei bbeix: “Lei ddo a,” eine bbeix nia. Ajjix sixl su mel lei ddo a. Lei yuex su ca hazza mel, Arbosobo dder yaa leil olga vi meixl da.

<sup>18</sup> Sul eil ber leil vaexr har zaxr dae, eil mel bbejjiur su ca hazza, ngo zabbar seirseir a nia leil bbeix gger zaxr, arseir sul eil ber leil azo lerler vaexr deix dax gger arddeirnga a, Arbosobo dder sul eil ber leil vaexr dae goxrsol-goxrnaxr mel yar leil goxr lol. <sup>19</sup> Arseir sul eil ber leil azo lerler huax pixl gger arddeirnga a, Arbosobo dder yar leil sul eil ber leil vaexr dae olga zza saer mel nr zzor lol nei seirceix-seirmaer zzi hal ddei gga nr ddir lol.

<sup>20</sup> Cirza-hanga eil mel mel ngazi a. Ca leil saexl lol su hal ddei bbeix: “Nga a; ngo cirleixr a dder jjixr lei du a,” eine bbeix a.

Amae! Seirpor Yisu ni nialngasael jjixr lei.

<sup>21</sup> Seirpor Yisu leil cirza-hanga seirseir mel Arbosobo ddei cassor-worssor leil meixl gger lol nia. Amae!

---

<sup>n</sup>**22:16** *Daxlweixl giedae ca a* Xilaxl ddar bbeix: “Daxlweixl ddei yarji.” Yilsi mel dder Daxlweixl giedae ca.